

Diosen' bonite' nación Efraín da'
gosejnilaže' lgüa'a Isaca'



Dios destruyó la nación de Efraín
por su idolatría

**Diosen' bonite' nación Efraín da'
gosejnilaže' lgüa'a Isaca'**

**Dios destruyó la nación de Efraín
por su idolatría**

**Resumen del Antiguo Testamento
en el zapoteco de Zoogocho
Volumen VI**

LA LIGA BÍBLICA



**LAS SAGRADAS ESCRITURAS PARA TODOS
LIGA DEL SEMBRADOR, A.C.**

“Las Sagradas Escrituras para todos”

Publicado por

LA LIGA DEL SEMBRADOR, A.C.

Apartado 14-351

07810 México, D.F.

La ilustración en blanco y negro opuesta a la página 1 así como las ilustraciones en las páginas 22, 46, 69, 77 y 80 son propiedad de la Fundación David C. Cook, usadas con permiso.

Primera edición

**Dios destruyó la nación de Efraín por su idolatría
en el zapoteco de Zoogocho**

94-081 México, D.F. .5C

1994

Da' gole da' bžia Diosen' bia' gone'

Resumen del Antiguo Testamento

Este libro es el sexto volumen del Resumen del Antiguo Testamento que presentamos en una serie de siete.

- Volumen I:** Can' goc cate' gwxe yežlion'
Cómo comenzó el mundo
- Volumen II:** Diosen' chebeje' bene' Israel ca' Egipto
Dios saca a los israelitas de Egipto
- Volumen III:** Bene' Israel ca' gosone' güedenag len
Diosen'
Los israelitas desobedecieron a Dios
- Volumen IV:** Bene' gosaclene' nación Israel gwde
got da' Moisésen'
Los líderes de Israel después de la muerte
de Moisés
- Volumen V:** Cate' gosenabia' rey Saúl na' rey
David bene' Israel ca'
Los reinados de Saúl y David en Israel
- Volumen VI:** Diosen' bonite' nación Efraín da'
gosejnilaže' lgu'a lšaca'
Dios destruyó la nación de Efraín por su
idolatría
- Volumen VII:** Bene' Israel ca' besyega'ane' pres
Babilonia gayonši iz
Los israelitas fueron desterrados a
Babilonia por setenta años



Rey Joacim bzeye' yiš gan' bzoj Baruc xtiža' Diosen' cont
blo'e bi chejli'e çhen.

Introducción

Xtiža' Dios nyojen diža'xtil le'e libr da' nzi' LA BIBLIA. Part nechw nzi' EL ANTIGUO TESTAMENTO, na' zejen Da' Gole Da' Bžia Diosen' Bia' Gone'. Part gwchope nzi' EL NUEVO TESTAMENTO, na' nyojen diža'xon le'e libr da' nzi' Diža' Güen Che Xancho Jesucristo.

Libr da' noxo' nga nzi' Can' Goc Cate' Gwxe Yežlion'. Naquen libr nechw lao gaže cuen libr da' chesoen' diža' ĉhe da' ca' zjanyoj le'e da' nzi' El Antiguo Testamento. Libr nechw nga nsan' da' zan da' žialao da' zjanyoj le'e part nechw ĉhe El Antiguo Testamento, part da' nzi' Génesis. Gague nyoj doxen Génesis de diža'xon cont beyaše'ch libr nga. Še chaclažo' gwlabo' doxen Génesis, cheyaļa' yeyiljon le'e Biblia de diža'xtil.

Índice

sección

página

100. Rey Salomón	na' bene' to lni cate' beyož gosone' yodao' blao che Dios	1
101. Rey Salomón	goque' bene' gwnabia' xen	3
102. Salomón	na' bich bzenague' che Dios cate' ba goc zan iz chnabi'e	5
103. Nación	che bene' Israel ca' bchojen chople	7
104. Rey Jeroboam	gwnabi'e zan cuen bene' Israel ca' gan' nzi' Efraín	9
105. Gayo'	bene' mal ben' gosenabi'e nación Efraín..	12
106. Roboam, Abías	na' Asa gosenabi'e nación Judá	12
107. Elías	gwdiļe' rey Acab ben' gwnabi'e Efraín	17
108. Rey Acab'	benchgüe' da' mal	24
109. Josafat	gwnabi'e gan' nzi' Judá.....	27
110. Chope	xi'iñ Acab gosenabi'e nación Efraín, na' Eliseo boļane' xļatje Elíasen' cho'e xtiža' Dios	31
111. Eliseon'	bene' yeļa' guac da' zaca' yebanecho	33
112. Diosen'	bosle' bene' Efraín ļo na' bene' Siria ca'	38
113. Joram	gwnabi'e lao nación Judá	42
114. Jehú	boñit boļane' diaža che da' rey Acab	43
115. Atalía	na' Joás gosenabi'e nación che Judá.....	47
116. Joel	be'lene' bene' Judá ca' xtiža' Diosen'	51
117. Diosen'	gwseļe' Jonásen' gwdixjue'ede' xtižen' len bene' ca' že' Nínive.....	53
118. Bene'	ca' gosenabi'e nación che Efraín	55

119. Jotam na' Acaz gosenabi'e Judá	55
120. Isaías na' Miqueas goso'e xtiža' Diosen'.....	58
121. Nación dan' nzi' Efraín beniten	60
122. Ezequías gwnabi'e lao nación Judá	62
123. Caten' gosenabia' Manasés, Amón na' Josías lao nación Judá.....	67
124. Joacaz na' Joacim gosenabi'e lao nación Judá....	73
125. Bene' Caldea ca' gosezene' bene' ca' že' Judá na' goseghe'e legaque' Babilonia	76
126. Ben' le Joaquín gwnabi'e Judá.....	82
127. Ben' gože' Ezequiel gwdixjue'ede' xtiža' Diosen' len bene' Judá ben' zjanita' Babilonia	83



Salomónna' bene' to lni che yodaon' dan' babeyožen, na' beņe' ca' gosalj lo diaža che da' Leví jasesane' cajan' lo' yodaon'.

100. Rey Salomónna' bene' to lni cate' beyož gosone' yodao' blao che Dios

(1 Reyes 8:1 — 9:9; 2 Crónicas 5:2 — 7:22)

Cate' rey Salomónna' beyož bene' yodao' blaon' gwñabde' yogo'lo! bene' blao che Israel yesyedobe' Jerusalénna' šlac go!a' lni dan' gosene' lni che Ranšw Yix. Salomónna' goclaže' gone' to lni che yodaon' dan' ba beyožen na' šjasyesane' caj gan' yo'ošagüe' yej ta'a ca' gan' zjanyoj ley che Diosen' lo' yodao' na'le, le ne' xoan lo' yo'o de lache' dan' ben rey Daviden'. Na' cate' yogo' bene' ca' ba besedobe', bene' ca' gosalj lo diaža che da' Leví jasyesane' cajan' lo' yodao' che Diosen' na' gosexoašagüen' lo' quart gwchopen' dan' bososi'e Latje Gan' Zoa Dios na' cože' cajan' bosonite' lgua'a lsaca' che angl ca' chope. Šinga da' že' lo' cajan' ca hora' chop yej ta'a gan' zjanyoj ley che Dios. Žana' bene' Israel ca' gosote' be zan juisyw no xila' no goñ cont gosonxene' Dios, na' bħoz ca' na' yezica'chle bene' ca' gosalj lo diaža che da' Leví bosocueže' no stroment na' gosole' gosonxene' Jehová ben' nac Dios chegaque' le naque' bene' güen na' gocde' legaque'. Na' šlac cheso!e'na', Diosen' betje' lo' yodaon' to lo' bejw chactit na' bħoz ca' bi goc yesenite' lo' yodaon', le bejon' gotechguan. Nach Salomónna' gwne':

—Diosen' naque' bene' güen, na' gwleje'
Jerusalénna' ca ciuda che' na' gwleje' da' xa' David ca
rey. Cate' xan' goclaže' gone' to yodao' blao, Diosen'

gože'ne': "Gaclena' to bi' ċhio' gombe' yodao' blaon'".
Na' n̄a'a Diosen' ba bene' dan' gwċhebe' gone', le n̄a'a
neda' naca' rey ċhe Israel na' ba goclene' neda' cont
bena' to yodao' ċhe' na' ba gwċoa' lo'enna' caj gan'
yo'o ley ċhe Diosen'.

Nach Salomónna' bolgüiže' Diosen' gože'ne':

—Ne to' da' ca' chesejnilaže' bene' da' bi zjanac
dogualje Dios bi zjazaca'leben ca le', Dios ċhia', le
chono' ca žo' cate' chgo'o cho'o to da' gono'. Na'
n̄a'a chle'eto' ba beno' da' gwċhebo' gono' len da' ċa'
rey David, le gožo'ne' še diaža ċhe' yosozenague' ley
ċhion', bia'cze soa to diaža ċhe' n̄abi'e Israel. Na'
chata'yoeda' le' n̄a'a gono' len neto' can' ba gwlo'o
cho'o len da' ċa'.

`Neda' ba bena' to ližo', ċguac so' le' lo' yo'o da'
ben benaċhze? Nezetu' nacchgo' bene' zaca' juisyw na'
n̄lano' doxen yaban' na' gate'tezchle toši'ize. Ba
gwċhebo' so' yodao' nga ba bena', na' n̄a'a chn̄abda' le'
soašco' nga bate'teze. Cate' bene' yež ċhio' yosolgüiže'
le' lo' yodao' nga o cate' yesene'e ngale zjanite'
zito'te, chn̄abda' le' gwzenagšco' ċhe'. Na' cate' bene'
yež ċhio' yesone' da' mal na' gwnežjo' latje bene' ca'
cheseque'ede' legaque' yesone' legaque' gan lo' gwdiła',
o se'lo' gwbin o bi gono' yejw, o se'lo' to yižgüe' o
no biše'zo yesagwba' da' chesaze', nach še legaque'
yosolgüiže' le' na' yeseċhebe' ba gosone' da' mala' na'
yososane' bich yesone' ca', chn̄abda' le' gwzenagšco'
ċhe' na' yezi'xeno' ċhegaque'. Na' še to bene' za' zito'
yende' catec bene' güenna' naco' na' yide' nga

yołgüiže' le', chṇabda' le' lecze gwzenagšco' che'. Na' qui yeseneze yogo' bene' že' yežlio len' naco' bene' zaque' na' yesezoe' le' bala'an. Na' la'czla' še bene' yež chion' yesone' da' mal na' le' go'o latj yeseche'xoṇj bene' zito' ca' legaque' nación ga nac zito', še legaque' yesechebe' ba gosone' da' mal na' yosolgüiže' le' yesene'e do ngale ga zoa yodaon', chṇabda' le' yezi'xenšco' chegaque'.

Cate' beyož bolgüiž Salomónna' Dios, Diosen' bene' ga blažo' yi' yaba cont bzeyen beyixe' ca' gosote' gosonxene'ne'. Nach yogo'loł bene' goso'e yela' choṇcLen che Diosen' na' bosozoa xibe' lagüen'. Nach reyen' na' bene' ca' yezica'chle gosotche' ye be zan juisyw no xila' na' no go'ṇ cont gosonxene' Diosen'.

101. Rey Salomón goque' bene' gwnabia' xen

(1 Reyes 9:10 — 10:29; 2 Crónicas 8:1 — 9:29)

Galj iz belale rey Salomón chone' yodao' blao che Dios len yo'o gan' gwzoo cuine'. Bene' byen bene' zito' ca' zjanita' gan' mbane Israelen' gosone' žin che yo'o ca' na' bichle žin da' gota'. Na' bene' byen gosone' to ze'e xen da' gwyečhjen ciuda Jerusalén, na' gosone' yeto yo'o gual ga gac yesenite' binlo še no yesediłlene', na' lecze gwxie' bal ciuda cobe ga mbane Israelen'. Na' goque' txen len ben' gose'e Hiram, ben' goc rey che Tiro, gosesele' xoṇj barcw do nación zito' gan' jasexi'e no oro, no yejese da' zjazaca'chgua, no yag da' zaca', no marfil na' no be nzi' manšin.

Na' goquen', no'ole ben' gwnabi'e gan' nzi' Sabá bende' diža' nac Salomón bene' sina' na' bene' gwni'a, nach gweje' jãe'e le'. Na' cate' gwñabde'ne' bica' da' zjanac zdebe, boži'e xtižen' be'e diža' sina'. Na' cate' ble'e no'olen' ca xdan nac gan' gwzoa Salomón na' ca šagüe' ca güen nonen', nach gože'ne':

—Bi gwejli'a diža' čhio' da' gose' bene' neda'. Perw ña'a ba ble'e cuina' na' chache'eda' ñe late'ze bi gose'e neda' can' nac yeļa' gwñi'a čhio'. ¡Mbalaz nita' bene' lo' yo'o čhio' na' bene' ca' cheson žin zaca' čhio'! ¡Güen juisyw chon Diosen' len nación Israel čhelen' da' bene' ga zo' chnabi'o, na' chnabi'o binlochgua.

Nach no'ole gwnabian' bnežjue'ne' no oro, no yejese da' zjanac da' zaca'chgua na' len bi da' chļa' zix. Na' lecze ca' ben Salomónña' len le', bnežjue'ne' bite'tez da' gwñabe' da' ba yo'ošagüe' ližen'. Beyoža' no'ole gwnabian' beyej laže'.

Mechw xen botobe Salomónña' yogüiz da' bčhixjue' bene' zito' ca' len bene' Israel gualaž che' ca'. Gosone' to siyw xen da' gwzoan sibe gan' gwchi'e chnabi'e. Gosonen' de marfil na' bosoguzjen' oro. Na' gosone' xop nepe' ga gwloe' bžine' lo siyen', na' to to cuenen bosozoe' chop la'a to lgua'a lsaca' che ben' nzi' leon na' lecze ca' bosozoe' yetgüe'jba' chop la'a cuit ga gwxoã ne'e. Salomónña' gwdape' to tas de oro da' bčhine' cate' bi da' güe'eje'. Na' gwnita' tap mil cabayw che Salomón be ja'acba' lo gwdile na' gwnita' ye šižinw mil cabayw be gosebie'. Na' da' gwnita' be

zan xcabayue', b̄xie' to ɕhope ciuda cobe ga bosoyoe'
be ca'. Nono bene' gwnabia' gwzoa lo yežlio bene'
goc bene' gwni'a na' bene' sina'ch ca le'.

**102. Salomónna' bich bzenague' ɕhe Dios cate' ba
goc zan iz chnabi'e**

(1 Reyes 11; 2 Crónicas 9:30-31)

Na' ca nac rey Salomónna' bebecgüede' no'ole.
Gwnita' zan no'ol ɕhe', na' zane' gosaque' no'ol zito'
la'czla' Diosen' bene' mandadw bi yosošagna' bene'
Israel ca' len no'ol nación yoble. Salomónna'
bšagna'lene' xi'in rey ɕhe Egipto na' len zanch no'ole
yoble, na' yogo' no'ol zito' qui gosaque' bene' nación
ga gosoxene' lgua'a lsaca'. Na' Salomónna'
gocchgüede' no'ol ɕhe' ca', na' cate' ba naque' bene'
gole gosego'oyeje' le' cont benxene' lgua'a lsaca'
ɕhegaque' ca'. Na' lecze bene' mes de yej gała'ze
Jerusalénna' ga no'ol ɕhe' ca' gosote' beyixe'
gosoxene' dan' bi nac dogualje Dios. Lencze le'
benxene' lgua'a lsaca' ca' la'czla' lecze benxene' Dios
dogualje. Nach Diosen' bloque' na' gože'ne':

—Le' bi bzenago' ɕhe ley ɕhia'. Da'nan' bich gua'
latje yesac diaža ɕhio' ca' rey ɕhe doxen Israel. Gona'
latje yesenabi'e late'dao'ze Israelen' gan' nac xišna'
bene' gosalj lo diaža ɕhe da' Judá na' ɕhe da'
Benjamín, le gwɕheba' len da' xao' rey David goša'ne'
to bene' diaža ɕhe' gaque' rey ɕhe Israel toli tocanē.
Chaclaža' yesenabi'e ciuda Jerusalén ni gan' zoa yodao'

čhian'. Perw zoa to bene' chone' žin zaca' len le', le' gwzoa' gaque' rey len yezica'chle bene' Israel ca'.

Gwzolaon žana' bene' nación ca' zjanyechje' Israelen' gosezolagüe' goseyixjue' da' zed len bene' Israel ca'.

Gwzoa to bene' goque' diaža che da' Efraín ben' gože' Jeroboam na' gwzoe' Jerusalén, le Salomónna' gwleje' le' cont goque' to bene' gwnabia' che'. Na' to ža cate' gwze'e lo ciudan' bežague' to bene' cho'e xtiža' Dios bene' gože' Ahías. Na' cate' Ahíasen' gocbe'ede' ne to nono bene' yoble zjanita' chesena' legaque' na' goļa' lache' cob dan' xoa cožen' bzoxygen' benen' šižinw pedas, nach gože' Jeroboam:

—Bexo' ši pedas lache' dan' xoa coža' nga, le Diosen' ba bžie' bia' gone' le' rey che ši cuen bene' Israel ca'. Bich güe'e latje yesenabia' diaža che da' David doxen Israel, le Salomónna' ba benxene' lgu'a'a lšaca'. Da'n'an' bich gac yesenabia' diaža čhen' doxen Israel, san yesenabi'e late'dao'ze gan' mbane Israelen' cont gac can' ba gwčheb Diosen' len da' David, le Daviden' gwzoacze' bzenague' che ley čhen'. Na' Diosen' che'nde' gwzende' le' še le' gwzenago' che ley čhen' gone' cont diaža čhio' ca' yesaque' rey na' yesenabi'e ši cuen bene' Israel ca'.

Na' Jeroboam gocchgüe' to bene' laš, da'n'an' Salomónna' gwlo'e lo ne'e ben' gosac diaža che Efraín na' Manasés, bene' ca' bgonče'e xšinen'. Na' Jeroboanna' bloque' dan' bgonče'e bene' diaža che' ca' žinna', na' goclaže' yedabague' rey, perw bi

gwxaque'de'. Nach Salomónna' goclaze' gote'
Jeroboam, perw bengaxje' gwyeje' Egipto, na'
bega'ane' na' cate'ch got Salomónna'.

Salomónna' gwnabi'e doxen Israel lao choa iz na'
cate' gote' xi'ine' Roboam gwdie' goque' rey.

103. Nación che bene' Israel ca' bchojen chople

(1 Reyes 12:1-24; 2 Crónicas 10:1 — 11:4)

Cate' got rey Salomón, xi'ine' ben' gože' Roboam
gwyeje' Siquem ga besežag yogo' bene' Israel ca' cont
yozozoe' le' rey chegaque'. Na' ba| bene' Israel ca'
goseže'e cha'le gan' mbane naciónna' ba besyeyaxe'
ben' gože' Jeroboam ben' gwzoa Egipto cont beyeje' le
ba got Salomónna'. Nach Jeroboam gwyeje' lao rey
Roboam na' gože'ne' can' gosacłaze' bene' gualaż che'
ca', gwne':

—Da' xen bchixjw xaon' neto' cate' gwnabi'e, še
le' yozexjo' dan' gwchixjo' neto', nach guac nabi'o
neto'.

Roboam gože' legaque' yesebeze' šone ža šlac
gone' xbab nacle gone' nach ye'e legaque' naquen' gac.
Nach be'lene' bene' gole blao ca' diža' ben' bosozejni'i
da' xen' na' gwñabde' legaque' naquen' chesacde'
cheyala' gone', na' legaque' gose'ene' cheyala'
gwzenague' che Jeroboam. Perw Roboanna' bi
gwyazłaze' can' gose'ene', na' jañabde' bene' migw che'
ben' zjanac bene' xcuide' cont yese'e le' naquen'
chesacde' cheyala' gone'. Na' legaque' gose'ene' cheyala'

yoži'e xtiža' Jeroboam ye'ene' cheyaļa' yeseyixjwche' da' čha'och ca dan' goseyixjue' caten' gwnabia' da' Salomónna'. Nach cate' Jeroboam na' bene' ca' zjanac le' txen ja'aque' lao Roboam cont yesenezde' nac yoži'e xtiža'gaquen', gože' legaue' gwčhixjwche' legaue' da' xench. Na' dan' bene' ca', goc con can' gwna Diosen' cate' gwsele' ben' gože' Ahías gwđixjue'ede' Jeroboanna' can' za' gac.

Nach cate' bene' Israel ca' goseže'e cha'le gan' mbane naciónna' gosende' can' gwna Roboanna' čhe dan' yeseyixjue' da' zčha'och, zane' gosene':

—¡Bich goncho txen len bene' ca' zjanac xi'in diaža čhe da' rey David! Cuinczecho güe'cho laze bi da' chac čhecho.

Nach jaya'ac lažgaue'. Can' goc, nación Israelen' bchojen čhople. Na' Roboanna' bega'anlene' čhop cuenga bene' Israel ca', bene' gualaž čhe' bene' gosac diaža čhe da' Judá len bene' gosac diaža čhe da' Benjamín, le lažgaue' nžaguen len laž bene' Judá ca'. Na' cana' gwzolao bososi'e nación dao' gan' gwnabi'en Judá. Na' yezica'chle bene' Israel ca' bich gosaclaže' nabia' Roboam legaue'. Na' cate' gwsele' to bene' gwčhixjue' legaue' gosote'ne' bosožie'ne' yej. Nach bosozoe' Jeroboam cont goque' rey čhegaue'. Nach Roboam btobe' bene' byo gosaque' diaža' čhe da' Judá na' da' Benjamín cont yesediłlene' bene' Israel ca' yezica'chle, godde' gone' byen yosozenague' čhe' cont yesyeyone' txen len le' da' yoble, perw Diosen' gwsele' to bene' gose'e Semaías na' gože' Roboanna' bi

cheyala' yesediłlene' legaque', le Diosen' bene' cont besechoje' chople. Na' cate' gosenezede' can' gwna Diosen' bich ja'ac soldadw che Roboanna' lo gwdiła' na' yogüe' jaya'ac ližgaque'.

104. Rey Jeroboam gwnabi'e zan cuen bene' Israel ca' gan' nzi' Efraín

(1 Reyes 12:25 — 14:20)

Beyož bchoj nación che bene' Israel ca' chople, Jeroboam gwnabi'e bene' Israel ca' goseže'e cha'le. Na' bososi'e nación chegaquen' Efraín, le Jeroboam goque' diaža che da' Efraín, na' gwleje' ciuda Siquem gan' goc laže' benen' ga cui'e nabi'e. Nach Jeroboam bi goclaže' šja'ac bene' ca' že' gan' chnabi'en Jerusalén cont šjasesane' bi da' šjasesane' yesonxene' Diosen', le bene' xbab chix še Roboam co'oyełe' legaque' yesyeyone' txen len le' da' yoble. Da'n'an' Jeroboam bxi'e to da' cobe da' yesejnilaže' bene' ca' gan' chnabi'en. Bene' chope lgu'a łsaca' che me' go'n dao' de oro na' gože' bene' ca' že' gan' chnabi'en cheyala' yesonxene' legacba' na' bich šja'aque' Jerusalen cont šjasete' beyix'e yesonxene' Diosen'. Toba' bzoe' gan' nzi' Dan na' yetoba' gan' nzi' Betel cont bi nactequen zito' šja'ac bene' šjasenxene'ba'. Ca' goc, bene' Efraín ca' gosonxene' lgu'a łsaca' da' bi zjanac dogualje Dios na' bi bosozenague' che Diosen'. Na' Jeroboam gwleje' bene' gosaque' bxož, perw bi gwleje' bene' zjanac diaža che da' Aarón bene' gwna Diosen' cheyala' yesaque' bxož che bene' Israel. Lecze bene'

l̄ni c̄he l̄gua'a l̄saca' c̄he me' go'ṅ daon' na' gwleje' lo
bio' xono' cate' yogüe' gosonxene'ba'.

Cate' goc l̄nina', ža nechon' Jeroboam gwyje'
jetue' beyix̄e' lao to l̄gua'a l̄saca' c̄he me' go'ṅ daon',
na' šlac zeche' chote'ba', Diosen' bene' cont bžin to
bene' Judá ben' gwsele' je'lene' le' xtižen', gože'ne':

—Bzenag diža' nga n̄ia' le'. Žin ža cate' to xi'in̄
diaža c̄he da' rey David yedeyetue' yogo' b̄xoz ca'
bene' chosozeje' beyix̄e' latje nga gan' ba bžio' bia'
yesonxene' l̄gua'a l̄saca' c̄hion'. Nach lecze nga
gwzeje' žit benat cont bi gaquen xilaže' na' bich gac
no gwčhinen. Cont gacbe'edo' xtižan' cho'elena' le'
naquen da' li, na'aža Diosen' gone' cont yeyinj mes de
vej nga gan' chzeyo' beyix̄en'.

Cate' bene Jeroboam xtiža' ben', leca bloque' na'
bene' mandadw yesezene' ben' be' xtiža' Diosen', perw
cate' gwłis ne'e bene' señw can' chaclaže' yesonen',
ne'ena' gwbižen na' beyinj mes de yejen'. Nach
Jeroboam gože' ben' be' xtiža' Diosen':

—Bołgüižšca Diosen' nabdo'ne' yeyac na' ni.

Ben' be' xtiža' Diosen' bene' ca' na' beyac na'
rey. Perw Jeroboam bi bša' xbab c̄hen', san bentezche'
da' mal ca' con can' ba gwzologüe' chone', na'
gwlejche' bene' bi zjanac diaža c̄he da' Leví na'
bzoe'ne' gosaque' b̄xoz c̄he bene' Efraín ca'.

Na' to ža gocšene bi' c̄he Jeroboam, bin' gože'
Abías na' gwsele' no'ol c̄hen' lao Ahíasen' cont
nabde'ne' še güeyaque Abíasen'. Ahíasen' goque' ben'

gože' Jeroboanna' gaque' rey. Na' ba nac Ahíasen' bene' gole na' ba nchole'. No'ol che Jeroboam bene' ze no'ole yoble cate' gweje' lao Ahíasen' cont bi gacbe'ede' naque' no'ol che rey. Perw cate' za' bžinte no'olen' gan' zoa Ahíasen', Diosen' bzejni'ide' Ahíasen' non' nac no'ola', nach Ahíasen' gože'ne':

—Bi gono' ze no'ol yoble, le nezda' naco' no'ol che Jeroboam. Ni de to rson da' gonen yegüine'do'. Beyej jayež bene' chion', Diosen' že': ""Neda' bzoa' le' naco' rey lo nación Efraín, perw bi chzenago' chia'. Ba bencho' da' mal clel ca yogo' bene' ca' ba gosanita'. Gualaz da' gono' xbab chia', ba beno' lgu'a' lsaca' da' chonxeno'. Da'nan' gwžiaya'a diaža chio'. Neda' gota' yogo' bene' byo zjanac diaža chio' cont yeniten." Lenna' xtiža' Dios da' yo'o bene' chion'. Beyej ližo', na' cate' yežino' la' gatte bi' byo chion'. Lebe' gacbe' bi' nechw bi' gat cont gac can' gwna Diosen'. Na' tena' Diosen' yozoe' yeto rey bene' nabi'e Efraín na' le' gote' yezi'cachle bene' ca' zjanita' lo diaža che bene' chion'. Na' žin ža cate' Diosen' gone' yesezaca'zi' bene' ca' že' Efraín, na' gone' cont bene' zito' ca' yeseche'xoxje'ne' lažgaque' gan' yesežaglagüe' neche da' mal da' chesone', le chesonteze' da' mal dan' ba bzejni'i Jeroboanna' legaque'.

Nach beza' no'ol che Jeroboanna' beyej liže' na' cate' bežinen' la' gotte bi' chen'. Na' bene' chen' gwnabi'e Efraín gayechoa iz na' cate' gote', to xi'ine' gože' Nadab gwzolaogüe' gwnabi'e.

**105. Gayo' bene' mal ben' gosenabi'e
nación Efraín**

(1 Reyes 15:25 — 16:28)

Nadab gwnabi'e bene' Efraín ca' ĉhop izga na' bi
bzenague' ĉhe Dios san bene' yogo' da' mal ca' da'
ben da' xen'. Na' goquen tñi'a zeje' jatillene' bene'
filisteos ca' na' to ben' gože' Baasa, bene' goc xan
soldadw ĉhe Nadaben' bedabague' betue' le' na' bołane'
xlatje' goque' rey. Na' beyožen' betue' yogo' bene' byo
bene' gosac diaža ĉhe da' Jeroboam.

Na' Baasa gwzoe' gwnabi'e bene' Efraín ca'
tapechoa iz, na' gwdena' gwnabia' Ela, nach Zimri
nach Omri. Ne toe' ca' bosozenague' ĉhe Dios, san
bosozanche' lgu'a lsaca' dan' gosejnilaže' bene' Israel
ca'. Diosen' gwsele' zan bene' goseyixjue'ede' xtižen'
len legaque' ben' gosata'yoede' legaque' yesyetingjde' ĉhe
da' xinjen' chesone', perw bicze gosacłaže'
yesyetingjden'.

**106. Roboam, Abías na' Asa gosenabi'e
nación Judá**

(1 Reyes 14:21 — 15:24; 2 Crónicas 11:5 — 16:14)

Beyož bchoj nación Israelen' ĉhople, xi'in da' rey
Salomón, ben' gože' Roboam, goque' bene' nechw
gwnabi'e gan' nzi' Judá. Na' bene' byen goc ciuda ca'
mbande' da' gual cont nono goc yeque'e yeła' gwnabia'
ĉhe', beyonšagüe' no yež yej da' zjanyeĉhjen ciuda ca',
na' lo ciuda ca' gwlo'ošagüe' no trigw, no, da'

yesagüe', len yogo' bichle da' yeseyažjde' še cate'
yedesediļlen beņe' ziton' ļegaque'.

Šlac gwnabia' Roboam nación Judá, bχoz ca' nita'
gan' nzi' Efraín len yezica'chle beņe' gosac diaža che
da' Leví gosa'aque' Efraín na' jasenite' Judá, ļe rey
Jeroboam che Efraín bich be'e latje yesone' xšin
Diosen' lažgaquen'. Bzoe' beņe' yoble gosaque' bχoz
che ļgua'a ļsaca' che me' goņ dan' bnite' Efraín. Nach
note'teze beņe' Efraín še gosaclaže' yesonxene' Jehová
ben' nac dogualje Dios, benen byen ja'aque' Jerusalén
gan' mbane Judá cont bžel bχoz beņe' gosote' beyiχe'
chegaque' bosozeye'ba' lao Diosen' gan' zoa yodao' na'.
Can' goc, beyac nación Judán' da' gual.

Ca nac rey Roboamņa', bzenague' che Diosen' šon
iz cate' za' gwzologüe' chnabi'e Judá, na' da'nan'
Diosen' goclene' ļe' cont nación Judá goquen to
nación gual.

Gwde da' šon izen', Roboanna' bich bzenague' che
Diosen', na' be'e latje yogo' beņe' ca' goseže'e Judá
gan' chnabi'en gosezologüe' gosone' latje gan'
gosonxene' no ļgua'a ļsaca'. Na' to to xišna' ļgua'a
ļsaca' gan' ja'ac beņe' gosonxenen' gosenita' beņe' byo
ben' gosata'lene' ļjež beņe' byoe' cont gosone' yeļa'
zto' len ļegaque'. Can' goc, beņe' Israel ca' goseže'e
Judá gosone' yogo' cuen da' xinj dan' goson beņe' ca'
goseže'e Canaán da' benen cont Diosen' bže'e ļegaque'
na' bebeje' ļegaque' gan' goseniten'. Da'nan' cate' ba
goc gayo' iz chnabia' Roboanna', Diosen' be'e latje
bžin rey che beņe' Egipto len soldadw che' ca'

gosedillene' bene' Judá ca'. Na' zan ciuda ga mbane Judá gosac lo na' bene' Egipto ca', na' besežintie' Jerusalén. Nach Diosen' gwsele' to bene' gože' Semaías be'lene' rey Roboam diža' txen len bene' gwnabia' che' ca', gwne':

—Diosen' ba be'e latje chac chele quinga da' bi chonle can' ža ley chen'.

Roboam na' bene' gwnabia' che' ca' besyegüine'de' lao Diosen' dan' gosone' da' malen', na' da' yoble Diosen' gwsele' Semaías cont be'lene' legaque' diža', gože'ne':

—Diosen' nezde' ba betinjele xtoļa'len'. Da'nan' bi güe'e latje gwžiai' rey che Egipto ciuda Jerusalén ni. Perw bia'cze gata' da' saca'zi' saca'yaše'le na' rey che Egipto gwchixjue' le'e mechw yogüiz da' nabi'e le'e.

Goc can' gwna Diosen', rey che bene' Egipto ca' len soldadw che' ca' con jasexi'e no tas platw de oro da' zjancua' lo' yodao' che Diosen' na' liž reyen', yogo' da' ca' ben da' rey Salomónna' mandadw gosone' šlac gwnabi'e. Na' Roboam bene' mandadw besyeyone' da' yoble da' bosoghine' gualaz da' ca' jasexi' bene' Egipto ca', perw bi gosonen' de oro san gosonen' de bronce. Nach cate' ba nca'a šino'chop iz chnabia' Roboanna' nación Judán', cana' gote' na' xi'ine' ben' gože' Abías gwdie' xlatje' gwnabi'e.

Abíasen' bzenague' che balze da' bžia' bia' Diosen' yesone'. Perw Diosen' be'e latje gwnabi'e cont goc can' gwlo'e da' baļi len da' xozxtagüe' rey David, gože'ne' xi'in diaža che' yesenite' yesenabi'e. Na'

gože'ne' yesenite' yesenabi'e le Daviden' gwzoacze' bzenague' che', toze dan' bene' cont gosote' ben' gože' Urías na' beque'e no'ol che', da' nga naquen da' bi bzenag Daviden' che Diosen'. Na' Abiasen' šlac gwnabi'e gweje' len soldadw che' ca' jasedillene' rey ben' gwnabia' Efraín na' Diosen' goclene' Abiasen' cont gosone' gan yogo' ni'a, le gwejnilaže' le'. Na' goseque'e ba| ciuda gan' mbane Efraín. Beyož gwnabi'e šon iz na' gote' na' xi'ine' Asa gwdie' xlatje' gwnabi'e.

Asan' goque' to bene' güen, le bzenague' che Dios na' bochinje' no yo'o na' no mes ca' gan' gosonxene' lgua'a lsaca' ca', na' bene' mandadw toz ben' nac dogualje Dios yesonxene' na' yesone' can' ža ley che'. Zan iz naciön ca' zjanita' do na' bi gosediłlene' bene' Judá ca', na' goc latje ben rey Asan' cont zan ciuda che Judá gosaquen da' gual, bosonite' ze'e xen da' gosechjen ciuda ca' na' btobe' zan soldadw ben' gosone' le' txen. Cate' bžin ža bene' goseže'e ga nzi' Cus jasedillene' bene' Judá ca', Diosen' goclene' bene' Judá cont gosone' gan. Na' beyož gwdiłen', to bene' gože' Azarías jašague' rey Asan', gože'ne':

—Diosen' chaclaže' soaczo' gwzenago' che', le še gono' ca', gac güen chio' bate'teze.

Nach Asan' bonite' lgua'a lsaca' ca' gosejnilaže' bene' ca' goseže'e Judá, lente bzeye' to da' gwejnilaže' tagüe' na' bich be'e latje no güe' tagüe' yela' bala'an neche da' chejnilaže' lgua'a lsacan'. Na'

šlac gwnabia' Asan', zan bene' goseže'e Efraín gosa'ac lažgaque' jasenite' Judá da' gosacbe'ede' Diosen' chaclene' nación Judá.

Cate' ba goc zan iz chnabia' Asan', bžin ža cate' Baasa ben' goc rey che Efraín gweje' len soldadw che' ca' jasedillene' bene' ca' goseže'e Judá. Nach Asan' jaxi'e mechw da' de yodao' na' len mechw checze' gwsejen' lao rey che Siria cont gwñabe' yesaclen soldadw che' ca' le'. Nach bene' Siria ca' jasedillene' bene' Efraín ca' na' da'nan' bich bi da' zed goson bene' Efraín ca' len ciuda ca' gan' mbane Judá. Perw Diosen' bi gwyazlaže' dan' gwñabe Asan' bene' Siria ca' yesaclene'ne'. Da'nan' gwseje' to bene' gože' Hanani be'lene' le' xtiže', gože'ne':

—Diosen' že': "Bi gwñabdo' neda' gaclena' le' cont beno' gan lao gwdilen' la'czla' neda' goclena' beno' gan cate' besežin bene' Cus ca' gosedillene' le'e. Da' nga na'a bi gwejli'o chia'. Neda' chgüia chña'a yogo' beñaçh na' chaclena' bene' chesonxene'nda'. Ba beno' da' bibi zaca' dan' gwñabo' goclen lao rey che bene' Siria ca'. Da'nan' gua' latje gata'ch da' zed chio' len yela' gwdile."

Rey Asa bže'e cate' bende' xtiža' Diosen' da' be' Hanani, na' bene' mandadw yesezene' Hanani na' yososaca'zi'ene'. Na' gague goc sša, gwzolao chac ni'a Asan', neca gwñabe' gaclen Diosen' le' lao chaque' ca', na' cate' gwde chop iz na' gote'. Ba gwnabi'e toyon iz cate' gote', nach xi'ine' Josafat gwdie' bołane' xlatjen'.

107. Elías gwdile' rey Acab
ben' gwnabia' Efraín

(1 Reyes 16:29 —19:21)

Do to chop iz za' gat rey Asa che nación Judá, got rey Omri che nación Efraín, na' xi'ine' Acab bolane' xlatjen' goque' rey. Acab goque' to rey bene' benche' da' xinj ca yogo' rey ca' ba gosenita'. Yeto da' xinj da' bene', bšagne'e len to no'ol zito' bene' gože' Jezabel. No'olna' goque' xi'in rey che to ciuda dan' nzi' Sidón, na' yogo' bene' Sidónna' gosonxene' to lgua'a lsaca' da' bososi'e Baal. Jezabela' gwlo'oyeje' Acab cont lencze' benxene' Baal na' bene' to yodao' che Baala' ciuda Samaria gan' chi'e chnabi'e nación Efraín. Na' lecze ben Jezabelen' cont gosote' bene' zan bene' goso'e xtiža' Diosen'. Perw Abdías ben' gwyo'o lo ne'e yogołol mandadw da' gota' liž rey Acab gocchgüede' Jehová ben' nac Dios, na' to lo' bloj bcuaše' to gayoa ben' goso'e xtiža' Diosen', na' yogo' ža jasane' da' gosagüe'.

Na' ca tiempa' gwzoa to bene' Efraín cho'e xtiža' Diosen', ben' gože' Elías. Na' to ža gwyeje' gan' gwzoa rey Acab na' gože'ne':

—Neda' naca' xmos Jehová ben' naque' doguale Dios, na' chgua'a da' bałi gac yejw Efraín ni con cate'ch neda' nia' gaquen.

Nach Diosen' gože' Elíasen' šeje' šjacuaše' cuit yegw dao' dan' nzi' Querit, na' šlac jacuaše' na' bechj ca' jasesamba' da' gwdagüe'. Na' sša bibi yejw goc Efraín, na' Acab bža'achgüe' na' goclaže' gote' Elíasen',

Esta ilustración
no está
disponible.

Šlac Elíasen' jacuaše' cuit yegw dao' dan' nzi' Querit, bečj
ca' jasesamba' da' gwdagüe'.

perw bi beželde' le' la'czla' beyiljwože' le'. Elíasen' bga'ane' cho'a yegw Querit sša, perw bžin ža cate' bebiž yegon' dan' bibi yejw goc. Nach Diosen' gože' le' šeje' to yež da' chga'an gała'ze Sidón na' yega'ane' liž to no'ol güezebe. Na' cate' Elíasen' bžine' yeža', ble'ede' to no'ol güezeb chotobe' guague, na' gwñabde' le' gwnežjue'ne' late' da' gagüe'. Na' no'ol güezeba' gože'ne':

—Da' de liža' šinga late' dao' yezj na' yelate' dao' set na' šintec gaquen gonan' to yetextil dao' čhia' len che bi' čhia' na'ze.

Perw Elíasen' gože'ne':

—Zgua'tec gono' to yetextil čhia' nach guac gono' yeton da' gac che chople len bi' čhion'.

Lecze gože'ne' še gone' con can' chi'enen' nach Diosen' gone' ga sibia' yezjen' len seta' cate'ch gac yejon' da' yoble. Nach no'ol güezeba' bene' to yetextil dao' che Elíasen', na' seta' len yezja' da' li gosezibian' šlac goc gwbinna'.

To ža bi' che no'ol güezeba' güe'echgüebe' na' gotbe'. Perw Elíasen' bolgüiže' Dios gwñabde' le' gaclene' no'ol güezeba' da' ba benchgua no'olen' güen len le', na' beyoža' bda' cho'en cho'a bidaon' na' blobe'be' na' bidaon' bezoabe' biš xne da' yoble. Cate' no'ol güezeba' ble'ede' ba beban bi' čhen', gocbe'ede' Elíasen' da' li naque' to bene' gwseła' Dios cont cho'e xtižen'.

Ca' gwde šon iz bi chac yejon' na' gota'chgua gwbinna' doxen Efraín. Na' šlac na' Acab ne' cheyiljue' Elíasen' nile na'le. Nach to ža Diosen' gože' Elíasen' šeje' lao Acab na' ye'ene' ba zoa gac yejua'. Na' gwyej Elíasen'. Na' con ca ble'e Acaben' le' gože'ne':

—iNa'ach bela'o, le ba gwduxjwchgo' da' zed doxen nación chechon'!

Perw Elíasen' boži'en gože'ne':

—Gague nedan' gwduxjua' da' zed nación checho nga san len' dan' bi bzenago' ley che Diosen' na' chonxeno' Baal. Na' na'a le'eščdo' non' nac dogualje Dios. Gož yogo' bene' že' Efraín ni šja'aque' ya'a dan' nzi' Carmelo na' gwche' yogo' ben' cheso'e diža' dan' chesene' gož Baalen' legaque'.

Nach Acaben' bsa' btobe' yogo'loj bene' na' gwche'e bene' ca' goseziye'e gosene' cheso'e diža' dan' gož Baalen' legaque', na' cate' besežin yogo'lole', Elíasen' gože' legaque':

—iBixčen' ca chechoglaže'tegale non' zaca' gonxenle? Še Jehová nan' nac dogualj Dios, le' le gonxen, na' še Baal, len' le gonxen.

Na' ne to nono boži'i xtižen'. Nach Elíasen' gože' legaque' da' yoble:

—Yetoga neda' ne' mbana' choa' xtiža' Jehová na' ni zjandob tap gayoa yo gašj bene' cheso'e xtiža' Baal. Na' na'a na'ščcho noen' nac ben' zaca' gonxenko. Le cuejšc chop go'n na' bene' ca' cheso'e

xtiža' Baal cheyaļa' yesone' to mes de yej ga yesote' toba' na' yesexoe'ba' lo mesa' len guague. Na' neda' gona' yeto mes na' gota' ben' yeto na' xoa'ba' lo mes çhian', perw ne toba' bi gwxencho yi' çheba' cont šeyba', san to tocho nabecho ben' chejnilaže'cho seļe' yi' cont šey go'n çhechon'. Na' ben' gone' ga lažo' yi' yaban' gwzeyen go'na', len' naque' dogualje Dios ben' zaque' gonxenchone'.

Yogo'ze bene' ca' gosacde' naquen güen can' gwnen', na' bososya'adie' gosene' guaccze. Elíasen' bnežjue' latje cont bene' ca' chesene' cheso'e xtiža' Baal gosebie' to go'n be gosazlaže', na' zgua'tec ļegaque' bososiņa' çhegaque' šezil dao'. Nach ļegaque' gosot go'n çhegaquen' na' gosezolagüe' chosolgüiže' Baal. Doxen šeziļ bžinte do gachol ža chosolgüiže'ne', perw ne to bitbi goc. Gachol ža gwzolao Elíasen' chonļe çhegaque' gože' ļegaque' cheyaļa' yesosya'ache' ļe bilja nļatj Baala' o še chonchgüe' xbab o še bi zoe', še ga zeje' o še chtase'. Nach bene' ca' bososya'ache' na' goseçhogte do ļe'e yid xagaque' len spada gosacde' yesonchgüe' cont gwzenag Baala' çhegaque'. Perw ļa'czļa' gosenite' do ža bososya'achgüe' na' gosone' cuine' zi', bibi goc.

Nach Elíasen' ben mes de yej çhen' gan' gonxene' Jehová, na' betue' go'n çhen' gwxo'e'ba' lo guaga'. Na' bene' to xnez nis cue'e'j cuit mes çhen' na' bzažede' mesa' nis beža'te xnez nis dan' de cue'e'j cuit mesa'. Na' šeže'le, hora' zjambeje' chesote' beyix'e' chosozeye'ba' cont chesonxene' Diosen', Elíasen' bolgüiže' Diosen' zižje gwne' qui:



Mes de yej çhe Elfasen' gan' xoa go'n çhe' bzaže'den' nis
na' beža'te xnez nis dan' de cue'ej cuit mesa'.

—Jehová, na'aža ben ga yesele'e yogo' bene'
Efraín quinga tozo' len' naco' dogualje Dios ben' zaca'
gonxen benachen', na' neda' naca' xmoso'.

Nach Diosen' bene' ga blažo' yi' yaba bostoten
dan' žia lo mesa' len mes de yeja' na' lente nis dan'
žia lo xnez nisa'. Na' cate' besele'e bene' ca' can'
goca', nach gose'ene':

—Da' li Jehová naque' dogualje Dios ben' zaca'
gonxencho.

Nach Elíasen' gože' legaque':

—Le gwčežo' yogo'loł ben' chesene' cheso'e xtiža'
Baal, ne toe' ca yela.

Nach bosočežo' bene' ca' legaque' na' ža na'te
betw Elíasen' yogo'loł ben' goso'e xtiža' Baal. Nach
Elíasen' gože' Acab yeyej liže' bedao'nez, le še bi
yeyejsese' na' dole' yejw. Caten' gože' le' ca', ne late'
bejw ca chi' le'e yaban'. Nach beyej Acaben' ližen' na'
žana'te gocchgua to yejwsio'. Cate' Acab bežin liže'
na' gože' no'ol che' Jezabel can' ben Elíasen' betue'
yogo'loł ben' gosene' goso'e xtiža' Baal. Na' Jezabelen'
blocchgüe' na' gwsele' rson lao Elíasen' gože'ne' gone'
byen gote' le' yeyečhj žaze. Perw con ca gwneze
Elíasen' da' nga, bxonje' gwłague' doxen gan' mbane
Judá bžintie' gan' zoa Ya'a Sinaí. Na' bželde' to bloj
ga gwyo'e gote' gwtase'. Nach Diosen' bolgüize'ne' na'
gwabde'ne' bixčen' ba bxonje'. Na' Elíasen' gože'
Diosen':

—Yetoga neda' chga'ana' naca' bene' chonxen le' na' ba chesyeyiljue'nda' cont yesote'nda'.

Na' Diosen' gože' le':

—Ne' nita' yegaž mil bene' Efraín bene' šlasze bina' yesonxene' Baal. Na' na'a beyej cha'le na' gož Eliseo le' gaque' bene' güe' xtižan' cate' bich so' le'.

Elíasen' bene' can' gož Diosen' le', na' cate' bežague' Eliseon', gw̄xoe' capa chen' cože' cont nezde' chbeje' le' gone' le' txen. Na' gague goc sša cate' Eliseon' gwyeje' jasoe' liž Elíasen' jaclene' le'.

108. Rey Acab' benchgüe' da' mal

(1 Reyes 20 — 21)

Šlac gwnabia' Acab lao nación Efraín, to rey ben' gože' Ben-adad gwnabi'e nación gan' nzi' Siria. Na' Ben-adad bene' gwdiļe len ciuda Samaria dan' gocch ciuda blao ga mbane Efraín. Nach Diosen' gwseļe' to bene' cho'e xtižen' lao Acaben', gože'ne':

—Diosen' ba gwne' gaclene' le'e nacle bene' Efraín cont soldadw chele ca' yesone' gan gwdiļa'. Na' gaclene' le'e cont gacbe'ele naque' dogualje Dios ben' cheyaļa' šejnilaže'le.

Na' goc con can' gwna ben' be' xtiža' Diosen', goson bene' Efraín ca' gan gwdiļa'. Perw goccze to chop bio' bene' Siria ca' da' yoble gosaclaže' yesediļlene' bene' Efraínna'. Nach bžin ben' cho'e xtiža' Diosen' da' yoble na' gože' Acaben' da' nga:

—Diosen' ba gwne' da' yoble gone' cont bene' gualaz chele ben' šja'ac lo gwdilen' yesone' gan bene' Siria ca'.

Na' ca' goc da' yoble, gosone' gan gwdila'. Perw rey Ben-adad gwneyaše' gwnebe' bi got Acaba' le'. Da'nan' Acaba' gwzoe' yeļa' güexi'a len le' na' bsane' le' zjayde'. Nach Diosen' bloque' Acaba' dan' bi betue' Ben-adad na' gwsele' to ben' cho'e xtižen' ježe' le':

—Diosen' ba gwne' dan' gwzi'xeno' che rey che bene' Siria ca' bi betone', da'nan' le' cheyaļa' gato' gualaz le'.

Cate' bene Acaben' da' ngan' blocchgüe' na' beze'e zjayda liže'.

Gaļa'ze gan' gwzoa to liž rey Acaben' dan' gwzoa lo ciuda Jezreel, gota' late' yo che to bene' gože' Nabot. Yežlion' goquen che bene' lo' yo'o che Naboten', le da' xozxta'ogüe' ca' besecheļen' cate' bene' Israel ca' šižinw cuen goseļe'e doxen yežlio che Canaán tiemp che da' Josué. Rey Acaben' goclaže' si'e yo che Naboten' cont gazen' yiže' cuan da' gagüe'. Na' bšabe' mechw o yosoše'eden' yeto yo da' nacch güen latje yoble. Perw Nabot bi goclaže' gote' yo chen'. Nach blocchgua Acaben' na' bi goclaže' gagüe' cate' bežin liže'. Na' cate' ble'e no'ol che' Jezabeļen' chlocchgüe', gwnebe'de'ne' bixchen' chloque'. Na' gože' le' yogon'. Nach no'ol chen' jayse'ede'ne' len' naque' rey na' guac gone' con da' chaclaže'. Na' Jezabeļen' lecze gože'ne' le' si'e yon' na' gwnežjue'nen'. Nach bzoj Jezabelen' to chop cart len ben' gosac bene' blao

che ciuda Jezreel che'e legaue' yeseyiljue' chop bene' mal cont yosožie' Naboten' xya chol yesene' chneye'e che Dios len che rey. Goclaže' gac dan' nac ca' cont gata' to da' yosode'ede' Naboten' na' choglaon che' yesote'ne' yosotacue'ne' yej. le can' goc ley che bene' Israel ca' benen byen gwnita' chop bene' o bene' zanch yesagüe' xya che bene' güen da' xinjen' cont gac yesottie' le'. Nach Jezabelen' bchiše' cart ca' sey che rey Acab na' gwsejen'. Na' bene' blao ca' goseže'e Jezreel gosone' dan' gože' legaue' na' gosote' Naboten'. Cate' ba got Naboten' jasezende' Jezabelen', na' le' gože' reyen' ba got Naboten' na' ba guac yega'anlene' yo da' chaclaže'. Can' goc bga'anlene' yo che da' Naboten'. Nach Diosen' gwsele' Elíasen' ježe' Acab:

—Diosen' gwsele' neda' zedetixjue'eda' can' gac chio': gato' na' becon' yesele'eba' xchenon' lo yo can' gosele'eba' xchen Nabot. Ba ble'e Diosen' naco' to bene' chonchgua da' xinj, da'nan' yonite' bene' lo' yo'o chio' can' bonite' bene' lo' yo'o che Jeroboam na' Baasa.

Cate' bene Acaben' da' nga, gocbe'ede' che da' xinj ba bene' na' gwzoayaše'chgüe'. Nach Diosen' gwsele' Elíasen' gan' zoe' da' yoble cont gože'ne':

—Diosen' bi yonite' bene' lo' yo'o chion' šlac ne' mbano', san gonen' cate' xi'inon' ba naque' rey che nación Efraín.

109. Josafat gwnabi'e gan' nzi' Judá

(1 Reyes 22:1-50; 2 Crónicas 17:1 — 21:1a)

Šlac rey Acab chnabi'e nación Efraín, xi'in rey Asa ben' gože' Josafat gwzologüe' chnabi'e Judá. Na' cate' za' gwzolao chnabi'e zan iz gwzoe' bene' da' güen na' bzenague' che ley che Diosen' na' goclaže' Diosen' gwzejni'ide' le' can' cheyaļa' gone'. Diosen' gwyazlaže' can' ben Josafaten' na' goclene' le' cont goque' bene' gwni'a na' bene' gual, na' goc yela' gwnabia' che' da' zaca'. Rey Josafaten' lecze bžiaye'e zan latje gan' gosonxene' lgua'a lsaca' na' bžone' yeson bene' byo ca' da' yela' zto' dan' gosone' len ljež bene' byoe' cate' gosonxene' lgua'a lsaca' ca'. Nach gwsele' xonj bene' gwnabia' che' txen len no bžoz na' yebaļ bene' yoble gosac diaža che da' Leví to to yež ga mbane Judá bosozejni'ide' bene' yež ca' can' ža ley che Diosen'. Na' ja'aque' zjanoxe' to yiš da' ndobe gan' nyoj ley che Diosen.

Perw cate' Josafaten' ba naque' bene' gwni'a na' ba chzechgua che', cana' bšague' na' xi'ine' Joram len to no'ole gože' Atalia. Benga goque' xi'in Jezabel na' Acab ben' gwnabia' Efraín. Cana' nación Judá gwzolaon chonen txen len nación Efraín. Gwde to chop iz gwyej Josafaten' jane'e Acab ciuda Samaria da' gocch ciuda blao che nación Efraínna', na' Acaben' gože'ne' chaclaže' yesaque' txen yesedillene' bene' Siria ca'. Na' Josafaten' goclaže' gone' ca' perw gwne' zgua'tec cheyaļa' yesenabde' Diosen' še naquen güen yesone' ca'. Da'n'an' rey Acaben' btobe' tap gayoa

bene' ca' ba gwleje' cont chese'e le' can' ža Diosen',
 na' yogo'cze' gose'ene' Diosen' gone' cont yesone' gan
 gwdiļen'. Perw bene' qui bi bosozenague' che Dios
 san con goseziye'e reyen' gose'e le' cheso'e xtiža'
 Dios. Na' Josafaten' gwṇabe' še zoa yeto bene' yoble
 bene' chzenag che Diosen' cont güe'e xtižen' da' nac
 da' li. Nach Acaben' gože'ne' zoa yeto bene' le'
 Micaías, perw bi chazlaže' xtižen', le' yogo' ṇi'a
 chosṇisde' le' che da' mal, con bicz bi da' güen
 chi'ene' gac che'. Ł'czļa' gože'ne' ca' bia'cze ben rey
 Josafaten' byen gosaxe'ne' cont bosozenague' xtižen'.
 Na' Micaíasen' gože' legaque' bi yesone' gan gwdiļen',
 san Diosen' ba cho'e latje cheseziye' bene' ca' legaque'
 cont šja'aque' lo gwdiļe gan' gat rey Acaben'.

Bia'cze ja'ac chopte rey ca' lo gwdiļen', na' rey
 Acaben' gosone' le' güe' na' gote' lo gwdiļen', na'
 besyeyo'e cuerp chen' ciuda Samaria gan'
 bosocuaše'ne'. Na' cate' goseyibe' carret che' da'
 bchine' lo gwdiļen' beco' ca' gosele'eba' xchene' dan'
 gwłalje lo yo. Na' gocyane che Acaben' can' gož
 Diosen' Elíasen'. Cate' got Acaben' ba gwnabi'e nación
 Efraín chopechoa iz, na' bi' che' Ocozías gwdie' blane'
 xlatje'.

Nach cate' Josafaten' bežin liže' Jerusalénna',
 Diosen' gwsele' to bene' be'e xtižen' gože'ne':

—Bi chazlaže' Dios da' gocleno' rey Acaben', le'
 goque' bene' mal. Perw chbede' bočhinjo' mes ca' gan'
 bene' gualaž chio' gosonxene' lgu'a lsaca' ca', na' lec
 chbede' dan' chṇabdo'ne' can' cheyaļa' gono'.

Nach Josafaten' bzenague' che Diosen' na' bene' chach laže' bene' gualaž che' ca' cont gosonxene' toz Jehová ben' nac dogualje Dios. Le Diosen' bebeje' da' xozxta'ogüe' Egipton' na' bene' lo na'gaque' yežlio chegaque' da' nzi' Canaán. Josafaten' lecze gwleje' no juez na' gože' legaque' yososaque' cont yesone' yela' justis con ca cheyala'cze, na' bi yeso'e latje chixjo bene' cont gwša' yela' justis chegaque'na'.

To šlas zan bene' zito' besežine' cont yesediłlene' Josafaten' len soldadw che' ca'. Gosaque' bene' Moab, len bene' nzi' amonitas, na' no bene' Edom. Josafaten' bene' mandadw yogo' bene' že' Judá yesone' gwbas na' yesedobe' yesonxene' Diosen' yodao' blaon' cont yesenabe' bi yesaque' lo na' bene' zito' ca'. Na' bolgüiže' Diosen' lao bene' yež ca', gože'ne':

—Xana' Dios, napo' yela' guac xen. Beno' neto' yežlio ga zoato' da' nacto' xi'in diaža che da' Abraham. Da' xozxta'oto' ca' gosone' yodao' nga gan' chołgüižto' le' cont nabto' gacleno' neto' cate' chac bi da' chac cheto'. Cana' cate' da' xozxta'oto' besele'e nga, bi bi'o latje yeseque'e yežlio che bene' amonitas ca', bene' Moab ca' na' bene' Edom ca'. Na' na'a gwna'šc can' chesyebi'i bene' ca' neto' mal. Bi nezeto' nac gonto' dan' za'ac bene' quinga yesediłlene' neto', le zjanacche' bene' zanch ca' neto'. Perw chnabto' gacleno'nto' na' zoato' lez yoslao' neto' lo na'gaque'.

Diosen' bzenague' che Josafaten' na' gwsele' to bene' gose'e Jahaziel, gože' legaque':

—Bitw žeble, le Diosen' tillene' bene' ca' za'ac yosedillene' le'e. Gwxe le šja'ac le šjašag bene' ca' na' le'ele can' gon Diosen' yosle' le'e lo na'gaque'.

Nach yogo' bene' yež bosozoa xibgaque' goso'e yela' choxcen che Diosen' na' bene' ca' zjanac xi'in diaža che da' Leví, gosonxene' Diosen' goso'e diža' zižje dan' chesyebchgüede' ba gwna Diosen' yosle' legaque' lo na' bene' zito' ca'.

Beyechj ža cate' ja'aque' lo gwdile, Josafaten' bene' mandadw šja'ac xonje' yesebialagüe' lao soldadw che' ca' cont yosole' yesonxene' Diosen'. Na' cate' gosone' ca', bene' zito' ca' gosacžejlaže' na' gosezolagüe' gosedillen lježgaque'. Na' cate' besežin soldadw che Josafaten' gan' že' bene' zito' ca', besyeželde' legaque' ba gosate' chesetole' lo yon'. Nach bosyotobe' yogo'lol xšinlaz bene' zito' ca' na' jaya'ac ližgaque' chesonxene' Dios.

Nach cate' ba goc sša chnabia' Josafaten' nación Judá, da' yoble bene' txen len bene' Efraín ca'. Ca tiempa' Josafat goque' txen len Ocosías rey che bene' Efraín gosone' zan barcw da' gosaclaže' yosoghine' lo nesdaon' cont šjasexi'e bi da' yesote'. Perw Diosen' bi gwyazlaže' dan' bene' txen len rey ben' bi chonxene' le', da'nan' bene' cont gosebiayi' barcw ca' lo nesdaon'.

110. Chope xi'in Acab gosenabi'e nación Efraín, na'
Eliseo bołane' xłatje Elíasen'
cho'e xtiža' Dios

(1 Reyes 22:51-53; 2 Reyes 1 — 3)

Šlac Josafaten' gwnabi'e Judá, xi'in Acab ben' gože' Ocozías gwnabi'e Efraín. Na' to ža Ocozíasen' blažoe' ga nac sibe na' gocde' zi'. Goclaže' ņezde' še yeyacde', na' gwsele' xmose' ca' to ciuda che bene' filisteo ca' jasenabe' rson lao to lġua'a lsaca' dan' chesejnilaže'. Nach Diosen' gože' ben' be' xtižen' ben' gože' Elías:

—Gwyej šjašago' xmos rey Ocozíasen' na' yo'o legaque' cheyała' yesenabde' Dios gualaz da' yesenabde' no lġua'a lsaca'. Na' lecze yo'o legaque' šjasyeyeže' Ocozíasen' yob gate'.

Elíasen' bene' can' gwna Diosen', na' beyožen' xmos Ocozíasen' jasyesane' rson che reyen'. Cate' Ocozíasen' gwņezde' goso'elene' Elíasen' diža' leca bže'e. Nach gwsele' xonj soldadw che' ca' cont yesezene' Elíasen' na' yeseche'ene' lagüen'. Perw cate' besežine' gan' zoa Elíasen', le' gože' legaque':

—Lažo' yi' le'e yaban' gwzeyen' le'e cont nezele le xtiža' Diosen' choa'.

Nach blažo' yi' le'e yaban' bzeyen' yogüe' güe'ej gwdebe benen legaque'.

Da' yoble Ocozíasen' gwsele' yexonj soldadw che' na' lecz ca' goc chegaque'. Na' cate' gwsele' da' gwyon ni'a yeto cuen soldadw chen', xan soldadw ca'

gwyeye' jazon xibe' lao Elíasen' gota'yoede' le' bi gote' legaque'. Nach Diosen' gože' Elíasen' šejlene' bene' ca'. Na' gwyejlene' legaque' ježe' reyen' ba zoa gate' dan' janabe' rson lao to lgua'a lsaca' cont nezde' še yeyacde'. Na' gote' can' gwna Elíasen'. Chop izga gwnabia' Ocozíasen' cate' gote', na' beyoža' bene' biše' Joram bolane' xlatjen' gwnabi'e, le nono xi'ine' gwnita'.

Gague goc sša cate' Diosen' goclaže' yezi' yeque'e Elíasen' na' yeyeje' yaba to lo' be' bdono'. Na' Eliseon' ba chone' Elíasen' txen ba chdalene' le' gate'tez cheje'. Gosodie' yež zan, nach cate' besežine' yegw Jordánna', Elíasen' btob xadon čhen' na' bzeten' lo nisen', na' byaljo to nez cont gosodie' yegon' lo yo biž. Na' Elíasen' gocbe'ede' ba zoa yezi' yeca'a Diosen' le', da'nan' gwñabde' Eliseon' bi chaclaže' gone' cont gaclene' le' cate' za' yeze'e. Nach Eliseon' gwñabe' gwnežjw Spiritw čhe Diosen' le' yeļa' guac ca dan' bnežjue' Elíasen' cont gone' da' zaca' yesyebane bene', gwne':

—Ca bi' nechw chzi'be' da' zča'o byen čhe xabe' cate' ba gote', ca'cze chñaba' gono' nda' yeļa' guac čhio' cate' yezi' yeca'a Diosen' le'.

Nach Elíasen' gože'ne':

—Ba gwñabo' to da' zdebe, perw še le'edo' neda' caten' yeža', Diosen' gone' le' yeļa' guac ca dan' chaclažon'.

Na' šlac zjaya'aque' tnez concze ble'e Eliseon' to carret ca dan' chosočhine' cate' chja'aque' lo gwdiļe, zjanxobe cabayw len, na' carreten' len cabayw ca'

zjanaquen ca to da' chaļa'ninen. Carreten' bžinen to ło be' bdono' na' Elíasen' beyepe' ła'e yaban' to ło' be' bdono' bedao'nez. Perw bega'an xadon che' blažon' cate' beze'e. Na' becos Eliseon' łaen beyoxen' beyeje' cho'a yegw Jordán na' bzeten' ło nis yegon', gwne':

—¿Guaclen Diosen' neda', Dios ben' gwejnilaže' Elíasen'?

Nach da' yoble byaljo to nez ło nis yegon' nach Eliseon' gwłague' yegon' ga nac ło yo biž. Na' gosenita'ch bene' goso'e xtiža' Diosen', na' łagaque' gosone' byen seļa' Eliseon' bene' yesyeyiljue' Elíasen', gosacde' še Diosen' con beče'e Elíasen' to latje da' zoa zito' ga bcua'ane' ła'. Can' goc, Eliseon' gwseļe' bene' besyeyiljue'ne', perw nono bežel, ła Diosen' ba bezi' beque'ene' yaba.

Cana' Joram gwnabi'e nación Efraín. Gwnabi'e šižinw iz na' goque' bene' mal, ła'czļa' bi benteque' da' mal can' ben da' xe' Acab. Bi gwejnilaže' łagua'a łaśaca' dan' nzi' Baal, perw benxene' łagua'a łaśaca' che me' go'n dao' ca' gosenita' lažen'.

111. Eliseon' bene' yeļa' guac da' zaca' yebanecho

(2 Reyes 4 — 5)

Ca tiempa' got to bene' be' xtiža' Diosen', na' cate' goten' biņa' yeyixjue' mechw da' gwņabe' che to bene'. Nach ben' gwleje' ła' mechua' goclaže' que'e chope xi'in da' ben' be' xtiža' Diosen' yesondadzebe'

xšine' cont ca' yoçhixjue' dan' chaļe' çhen'. Nach no'ole güezeb çhe da' ben' be' xtiža' Diosen' begüine'chgüede', na' gwyeye' jaņe'e Eliseo ben' lecze cho'e xtiža' Diosen', gwņabde'ne' gaclene' ļe'. Na' no'ol güezeba' gocchgüe' bene' yaše' juisyw, šinga to xguague set gwzoa ližen'. Nach Eliseon' gože'ne' šjatiljue' zan xguague, con cate'te' da' želde', na' yososše'en len set dan' yože ļo' xguague daon'. Na' ca' ben no'ol güezeba' jaļeje' zan xguague na' bseyjw cuine' ļo' yo'o len bi' çhen' na' bososše'e yogo'ļoļ xguague dan' gosebej bene' ļen'. Na' gož Eliseon' no'ol güezeba' gote' seta' na' mechw dan' le'ede' çhenna', ļen yeyixjue' xya çhe da' bene' çhen' na' mechw dan' yega'aņa', ļen gwçhine' cont gacbane'.

Na' yež dan' nzi' Sunem gwzoa to no'ole ben' gwņezde' Eliseon' goque' bene' güen xšin Dios. Na' con cate' ble'ede'ne' chdie' cho'a ližen' bnežjue'ne' da' gwdagüe'. Na' to ža no'olen' len bene' çhe' gosone' yeļa' güexi'a yesone' to quart yichjo'o çhe ližgaquen' cont soa Eliseon' na' cate' tie' lažgaquen'. Eliseon' goclaže' güe'e yeļa' choçcĸen çhe no'ola' dan' ba gosone' güen len ļe', na' gwņabde' Diosen' gone' soa to bi' çhe', ļe nono xi'ine' nita'. Na' ca' goc, gwzoa bidaon' na' gwcha'obe'. Perw to ža gwzolao chyia'achgua yichjbe', na' ža na'te gotbe'. Nach xņa'ben' jaçoe'be' ļo xcam Eliseon' na' ļa' gwza'tie' jaydiljue'ne' na' beçhe'ene' ližen'. Cate' bžin Eliseon' gwyo'e ļo' yo'on na' bga'aņ toze' len bi' guaten'. Na' gwņabde' Diosen' yosbane'be'. Nach gwçhoe' ļe'e bidaon' cont boše'ede'be', bzoa cho'en cho'aben' cont blobē' ļo'

cho'aben'. Goc šlož na' bexa' yejlao bidaon' bebambe'.
Na' bonežjue'be' xna'ben' mbambe'.

Lecze do cana' gwzoa to bene' Siria bene' goc
xan soldadw ben' gože' Naamán, na' güe'ede' to
yižgüe' gual dan' gwda' le'e yid xen' dan' nzi lepra.
Na' gwzoa to bi' no'ol xcuide' dao' bi' ben žin len
no'ol che Naamán, gocbe' bi' Efraín. Bi'na' be'lembe'
no'olen' nac xamben' diža' gožbe'ne' zoa to bene' cho'e
xtiža' Diosen' ciuda Samaria dan' gocch ciuda blao
gan' mbane Efraín na' bena' guac yeyone' Naamánna'
len yižgüe' chen'. Cate' bene Naamánna' da' nga,
gwñabe' lsens šeje' Samaria, na' rey che Sirian'
bnežjue' latje šeje' na' bnežjue' le' to cart da' bzoje'
che rey Joram gwñabde'ne' yeyone' Naamánna' len
yižgüe' chen'. Nach gwyej Naamánna' bnežjue' rey
Joramen' carta'. Cate' Joranna' blabe' carten',
goczejlaže'chgüe', le gocde' še rey che Sirian' chde'ede'
da'na' cont gwxie' yeto gwdile len legaque'. Cate'
bene Eliseon' diža' can' chaquen' na' gwsele' rson len
rey gože'ne' sele' Naamánna' gan' zoen' cont nezde'
Israelen' zoa to bene' cho'e xtiža' ben' nac dogualje
Dios. Can' goc gwyej Naamánna' liž Eliseon'. Na'
cate' Naamánna' bžine' liž Eliseon' bi bchoj Eliseon'
san gwsele' bene' xmosen' ježe'ne' šeje' šjašo'o doxene'
gaž ni'a lo' yegw dan' nzi' Jordán, na' ca' yeyaque'.
Nach Naamánna' blocchgüe', le gocde' cuincze Eliseon'
cheyała' choje' yolgüiže' Diosen' cont yeyacde'. Na'
lecze gocde' bixchen' šeje' šjašo'o doxene' lo' yegw
Jordán, le zjadecz yegw da' zjanacch binlo lažen'.

Esta ilustración
no está
disponible.

**Bi' no'ole xcuide' dao' bi' ben žin che no'ol che Naamán
gožbe'ne' zoa to beņe' cho'e xtiža' Diosen' ben' guac
yeyone' Naamánna' len yižgüe' chen'.**

Naamánna' ba zoa yebi'e yeyeje' Sirian', cate' bene' xmosen' gose'ene':

—Bžešcnago', ša Eliseon' gwnabde' le' gono' to da' nac zdebe, la' gontion' ša ca'. Perw gwnabde' le' gono' to da' bibi zdeb naquen. ¿Bixchen' ca gonon'? Gague da' bi gacdon'.

Nach gwyej Naamánna' na' jašo'o doxene' gaž ni'a lo' yegw Jordánna', na' goc con can' gwna Eliseon', le cate' beyož bechoje' lo' yegon' da' zelagüe, ba beyacde'. Nach Naamánna' beyeje' liž Eliseon', goclaže' gwnežjue' le' bał da' zaca'chgua. Perw Eliseon' ne ton ca goclaže' si'e. Nach bebi'i Naamánna' zjade' Siria da' yoble. Gocze xtit beza' Naamánna' cate' jayxen xmos Eliseon' le'. Mosen' gože'ne' Giezi. Na' Giezin' gwnabde' Naamánna' gwnežjue'ne' bał da' ca' goclaže' gwnežjue' Eliseon' caten' gwyeje' ližen'. Benlaže' gože'ne' Eliseon' chyažjde' late' mechw na' to čhope lache' da' gwnežjue' čhope bi' güego' bin' chesoe' xtiža' Dios le za' besežimbe'. Nach be' Naamánna' le' da' ca' gwnaben', na' Giezin' bcuaše' da' ca' na' bebi'e bežine' gan' zoa Eliseon'. Gague neze Eliseon' ben Giezin' ca', perw Diosen' bzejni'ide' le' can' ba ben Giezin' na' cate' bežinen' Eliseon' gwnabde'ne' gože'ne':

—¿Bi ba beno'?

Na' le' gwne':

—Bitbi na' gona'.

Na' gože'ne':

—Nezda' bin' ba beno'. Perw ben xbab chion',
tiemp nga na'a bi chonen to bene' güen xšin Diosen'
te' nabe' mechw. Diosen' gone' da' saca'zi'o, le
gue'edo' yižgüe' dan' güe'e Naamánna' šlal mbano'. Na'
ca' goc.

112. Diosen' bosle' bene' Efraín lo na' bene' Siria ca'

(2 Reyes 6:8 — 8:15)

To ža šlac Jorám chnabi'e lao nación Efraín, rey
che Siria ben' gože' Ben-adad na' len soldadw che' ca'
ja'aque' jasedillene' bene' Efraín ca'. Perw bate'teze
soldadw che Efraínna' gosone' ca' bene' gosacbe'e bi
dan' yeson bene' Siria ca'. Nach Ben-adad gwnabde'
bene' lježen' noen' chdie' diža' lao bene' Efraín ca',
na' soldadw che' ca' gosi'ene':

—Ne toto' bi chdeto' dižan' san ben' choe' xtiža'
Dios ben' le' Eliseo, len' che'e rey Joram yogo'lo!
lente da' chšaljo' šižize lo' yo'o chio'.

Nach blocchgua Ben-adad na' bene' mandadw len
ben' chesaclen le' yesyeyiljue' ga zoa Eliseon' cont
sele' soldadw che' ca' yesezene' le'. Na' cate' gwneзде'
Eliseon' zoe' ciuda Dotán, gwsele' soldadw chen'
gosechje' ciudan'. Ca beyechj ža šezille bene'chon žin
len Eliseon' ble'ede' soldadw ca' na' gwne':

—¿Nacxe goncho?

Na' Eliseon' boži'en gože'ne':

—Bitw žebo, le zjanyanch soldadw bene' zjada' chio' clel ca ben' zjada' legaque'.

Nach Eliseon' gwṇabde' Diosen' gone' ga le'e xmosen', na' mosen' goc ble'ede' doxen lo ya'a cuit ciuda Dotánna' nža'te že' carret da' chja'ac lo gwdiḷe perw zjanaquen de yi' na' cabayw be chesexob carret ca' lecz zjanacba' be de yi' be che angl ben' gwseḷa' Dios. Nach Eliseon' gwṇabde' Diosen' gone' ga soldadw che bene' Siria ca' yesaque' ca bene' zjanchoḷ šlož. Na' Diosen' bene' ca'. Nach bchoj Eliseon' na' ježe' legaque' gosacžejlaže' neza' na' lecze ježe'ne':

—Na' gwlo'eda' le'e galen' chaclaže'le šejle.

Nach gwche'ene' to liča ciuda Samaria dan' gocch ciuda blao che bene' Efraín ca'. Naquen ca do šon hor nez. Nach gwṇabde' Diosen' gone' ga yesyele'ede' da' yoble. Na' Diosen' bene' cont besyele'ede'. Cate' Joram ble'ede' bene' Siria ca' goclaže' gote' legaque', perw Eliseon' gože'ne' cheyaḷa' gwnežjue' da' yesagüe' na' gwnežjue' latje šjaya'aque'. Na' benšaze' can' gož Eliseon' le'. Nach sša bososan bene' Siria ca' bich gosone' gwdiḷe len bene' Efraín ca'.

Gwde to tiemp rey Ben-adad goclaže' tiḷe' da' yoble len bene' Efraínna' na' ja'ac soldadw che' ca' jaseghje' ciuda Samarian'. Besyega'ane' sša na' bene' Samaria ca' bicze goc yesechoje' lo ciudan', na' ba chesattecze' gwbin. La'ay ca de ca chi' gosote' late' dao' güeje bi da' gose'ej gosagüe'. Na' da' besežaglaochgüe' nac da' ben gwbinna', gwzoo to no'ol

bene' beyot bidao' ghen' cont gwdagüe'be'. Na' rey Joram bde'ede' Eliseon' dan' goc qui, na' beçhoglaže' gote' le' çhogue' yichjen'. Nach gwsele' to soldadw liž Eliseon'. Perw Eliseon' gocbe'ede' zej soldadon' zjajdiljue'ne' cont yesote'ne' na' cate' bžin soldadon' bi gwsaljue' puerta'. Nach la' bžinte cuincze reya' na' Eliseon' gwsaljue' na' reyen' gože'ne':

—Yogo' da' mal dan' chac nga zan' che Dios. Bich napen cuent zoacho chbezcho gaclene' chio'.

Na' Eliseon' boži'en gože'ne':

—Diosen' ba gože' neda' gwxe ca na'a cho'a puert Samarian' yesote' yezj na' cebada baratwchgua.

Perw to bene' chon žin da' zaca' che reyen' ben' gwejlene'ne' liž Eliseo, gwne':

—Notno gac gon dan' nac ca'. La'czla' Diosen' zoe' yaban' gone' cont yeselažo' yela' guagw gan' zoacho nga, gague da' gaquen.

Nach Eliseon' boži'en gože' le':

—Le'eczdon' cuino' perw bi gac gagon'.

Do cože'le ze'e dan' nyeçhje ciudan' zej cuit puerta' gosenita' tap bene' Efraín gose'ede' yižgüe' gual le'e yid xen', to yižgüe' da' nzi' lepra, na' bene' qui besyeçhoglaže' šja'aque' gan' zjanon xišna' bene' Siria ca', gosacde' yejni'a yesot bene' Siria ca' legaque' clel ca' yesate' gwbin. Nach gosa'aque' zja'aque' na'le zej chxin. Cate' besežine' notno besyeželde' gan' zjanon xišna' bene' Siria ca', le Diosen' bene' ga gosene bene' Siria ca' žaš che carreten' dan' chja'ac lo gwdile na'

žaš ̣he be zan cabayw. Bene' Siria ca' gosacde' ba
 zja'ac bene' zan soldadw yesediłlene' ļegaque' na'
 bosyoxonje' bosyocua'aᅇ xšinłazen' zjanasłasen'. Za'
 bosyoxonjtie' caten' besežin bene' güe' ca' tap. Nach
 bene' güe' ca' gose'ej gosagüe' na' goseque'e late'
 mechw na' to ̣hope lache' da' bosyocua'aᅇ bene' Siria
 ca', cate' gosone' xbab, gosacde': "Mal naquen bi
 chzenecho bene' gualaž ̣hechon' yezica'." Nach ja'aque'
 cho'a puert ̣he ze'e da' nyečhje ciudan' na' bosozende'
 ben' chesape' cho'a puerta'. Na' bene' qui jasezende'
 rey. Na' reyen' gwseļe' to xonj bene' zjažia cabayw
 cont šjasene'e še naquen ca'. Cate' besyežinen'
 chesene' ļe ca' naquen, nach bene' zan besežaš ja'aque'
 na' bosyotobe' dan' nita' gan' zjanon xišna' bene' Siria
 ca'. Na' con can' gwna Eliseo na' goc, gosote' yezj
 na' cebada baratwchgua cho'a puert ̣he ciuda
 Samarian'. Na' ben' chon žin da' zaca' ̣he reyen' ben'
 bi gweyjeļe' gac da' quinga, bosolej bosošošj bene' ļe'
 cho'a puert ciudan' na' gote'. Na' goc can' gwdiłjue'e
 Eliseon', ble'ede' da' gocde' nono gac gon, perw ̣e
 laten' bi goc gagüe'.

Beyoža' Eliseon' gweyje' ciuda Damasco dan'
 nacch ciuda blaο gan' mbane Siria, na' rey Ben-adad
 güe'ede'. Nach Ben-adada' gwnelene' to bene' chon
 xšine' da' zaca' ben' gože' Hazael, gože'ne' šjanabde'
 Eliseon' še yeyacde' o še bich yeyacde'. Na' cate'
 gweyj Hazaelen', Eliseon' gože'ne' cheyaļa' ye'e Ben-
 adada' güeyacczede', ļa'czļa' gague da' ļi yeyacde'. Na'
 ļecze gože'ne':

—Le' yołano' xłatj Ben-adad gaco' rey ̣he Siria.

Nach Hazaelen' bežine' len Ben-adad na' gože' le': "Güeyacczedo'", perw beyeĉhj ža Hazaelen' betue' le' gw̄xoe' to lache' chel ĉhiž da' bis lagüen'. Beyoža' Hazaelen' gwzoe' goque' rey ĉhe Siria.

113. Joram gwnabi'e lao nación Judá

(2 Reyes 8:16-24; 2 Crónicas 21:1b — 22:1)

Šlac Joram chnabi'e lao nación Efraín, Josafat rey ĉhe Judá gote' beyož gwnabi'e šinechoa iz. Nach bi' nechw ĉhe Josafaten' bin' leće gože' Joram gocbe' rey. Con ca gwzolao chnabia' Joramen', bene' mandadw yesote' yogo' bi' biše' na' yogo' nochle ben' godce' xož yosołane' xlatjen'. No'ol ĉhe Joram gože'ne' Atalía na' goque' xi'in Acab rey ĉhe Efraín. Da'nan' bene' yogo' da' mal dan' goson rey ca' gosenabia' Efraín. Na' gague da' na'ze bene', san leće btipe'laže' bene' Judá ca' cont gosonxene' da' bi nac dogualje Dios. Da'nan' Diosen' bloque' Joram. Perw na' baĉhle gwlo'o cho'e len da' rey Daviden', gože'ne' bate'teze to xi'in diaža ĉhe' gac rey. Da'nan' ne to nono gwseła' Diosen' šjetoe' Joramen' cont yołane' xlatjen' gague' rey, bi bene' len le' can' bene' len ben' gosac rey ĉhe Efraín.

Ca tiempa' nación Judá chnabian' nación Edom na' bene' Edom ca' goseyixjue' mechw da' gw̄nab rey ĉhe Judán'. Perw besyedabaga' bene' Edom ca' na' gosone' gan lo gwdiļe len bene' Judán'. Diosen' bi'e latje goc da' quinga cont gw̄xaca'zi' Joram dan' goque' bene' güedenag. Na' leće bžin to cart lao Joranna'

dan' bzoj Eliásen' cate' biṇa' yezi' yeca'a Diosen' le',
žan: "Diosen' že' biṇa' gwzenago' che' can' ben da'
xao' Josafat na' da' xta'ogüo' Asa. Ba beno' da' xinj
con can' cheson ben' zjanac rey che Efraín. Beto' bi'
bišo' ca' bin' gosac bi' güench ca le'. Da'nan' Diosen'
güe'e latje yesac da' mal che bene' lo' yo'o chio' na'
len che nación chio'. Gue'edo' na' gato'."

Ca beyoža' Diosen' bi'e latje bene' filisteo ca' na'
bene' Arabia ca' gosediłlene' nación Judán' na'
besyeyo'e yogo' bi da' gota' che Joram, na' gosechi'e
no'ol che' ca' na' len yogo'loł bi' che' ca'. Toz bin'
naše'te bosyocua'ane'. Lecze be' Diosen' latje güe'e
Jorama' to yižgüe' lo' xejloe' da' beton le' cate' goc
ghop iz che'eden'. Cate' bgaše' Jorama' bitw ja'actec
bene' zan. Xono' izze gwnabia' Jorama' na' cate' gote'
xi'ine' bin' naše'te bin' gože' Ocozías bołambe' xłatjen'
goche' rey che Judá.

114. Jehú bonit bołane' diaža che da' rey Acab

(2 Reyes 8:25 — 10:36; 2 Crónicas 22:2-9)

Ocozías gwnabi'e Judá toga iz na' goque' to bene'
güen da' xinj. Xne'e, no'olen' gože' Atalía, goque'
xi'in Acab ben' gwnabia' Efraín. len' bzejni'ide' bi'
chen' bembe' da' mal. To že gweyey rey Ocozíasen'
ciuda dan' nzi' Jezreel jane'e rey Joram ben' goc rey
che Efraín, le Joram goque' güe' lo' gwdiłe cate'
gosediłlene' bene' Siria ca'.

Na' šlac zoa Ocozíasen' ciudadana', ben' choe' xtiža'
Diosen' ben' gože' Eliseo gwsele' yeto bene' cho'e

xtiža' Diosen' gan' gwzoo to xan soldadw che bene' Efraín ca', ben' gože' Jehú. Na' ben' gwseļa' Eliseon' bzo'e set yichj Jehú na' gože'ne' gaque' rey ben' nabi'e Efraín cate' gat Joram. Lecze gože'ne' Diosen' nžie' bia' gote' yogo' bene' byo ca' zjanac diaža che da' rey Acab na' lente no'olen' nac xna' rey Joram ben' le' Jezabel neče ba gosote' bene' zan ben' chesonxene' ben' nac dogualje Dios. Beyož gože' Jehún' doxen can' gwna Diosen', nach boxonje' beyej liže'. Cate' yezica'chle xan soldadw ca' gosenabde' Jehún' bi dižan' bedeye'len ben' le', gože' legaque':

—Neda' tia' gwłana' xlatje rey Joram.

Na' legaque' besyebede' gosaque' le' txen.

Nach Jehú na' yezica'chle xan soldadw ca' besyeyiljwlaže' nac yesone' yesote' Joram. Ne' zoa Joramen' Jezreel chon cuine' rmed cate' Jehún' gwyo'o lo' carret che' na' gwyeye' Jezreel. Lecze len rey Ocoziasen' gwzoe' Jezreel len Joranna'. Na' cate' besele'ede' ba zej Jehún' lo' carreten', legaque' lecze jaso'e lo' carret chegaquen' na' ja'aque' jasešague'ne'. Cate' besežine' gaļa'ze, rey Joram gwnabde' Jehún' še zeje' to šagüe' cont yesenite' binlo o še zeje' cont tiłlene' legaque'. Na' Jehú boži'e xtižen' gože'ne':

—Nono gac yesenita' binlo šlac ne' mban xna'o Jezabel na' šlac ne' chtipe'laže' bene' Efraín ca' cont chesejnilaže' lgua'a lsaca' ca' da' bi nac dogualje Dios, na' cont chesejle'e che yeļa' guaža'.

Nach Joranna' gocbe'ede' zej Jehú cont yeque'e yeļa' gwnabia' chen' na' bosye'e gože' Ocozias cheyaļa'


yoxonje' cont bi got Jehún' le'. Beyož gwne' ca' nach Juhú betue'ne' len to flecha, na' lecze betue' Ocozías, le choptie' gosaque' diaža che da' rey Acaben'. Beyoža' jasecho'one' cuerp che Joram lo yežlio che da' Nabot na' gwłalj xchene' do na'.

Nach cate' Jehún' bžine' lo yež Jezreel, ble'ede' Jezabel xna' Joram chca'ayene' to cho'a ventan lo' quart chen' dan' gwzoa yichj yo'o cha'te, na' bolgüiže' bene' ca' goson žin liž reyen' gože' legaque' yosozałe' Jezabelen' cho'a ventanle. Nach bosozala'ne' na' gote'. Gwdena' Jehún' gwsele' to cart che bene' blao ca' goseže'e ciuda Samaria ben' goso'o lo na'gaque' chosogole' bi' byo zjanac xi'in diaža che da' Acab, gože' legaque' yesebeje' to bi' gac rey. Perw bene' blao ca' goseže'e Samaria besežebchgüe' yesone' ca', na' gosesele' rson lao Jehú gose'ene':

—Ne tobe' ca chaclaže'to' gac rey.

Da'nan' Jehún' bene' mandadw yesote' yogo' bi' gosesele' yichjgacbe' lao Jehún'. Na' šlac chac ca', Jehún' lecze gwyeje' jetue' yogo' bene' yezica'chle byo ca'. Gayonšibe' gosac, na' gosote' yogo'be' na' zjanaque' diaža che da' Acab len bene' ca' gosaque' le' txen. Can' goc bonit bolan Jehún' yogo' bene' ca'. Goc cayanen' gwna da' Elíasen' caten' gwduxjue'ede' xtiža' Diosen' len da' rey Acaben'.

Jehú nan' goclaže' gone' cont bene' Efraín ca' bich yesejnilaže' lgu'a lsaca' dan' nzi' Baal. Da'nan' gwziye'e legaque', gwne' gac to lni xen che Baalen'. Na' bzende' cheyała' yesežin yogo' bxoz ben' chesote'



Can' nac carret da' bosochin rey ca'.

beyix̄e' cate' chesonxene' Baalen' na' yogo' bene' ca' chesene' cheso'e xtiža' Baal. Na' cate' yogüe' ba besežine' yo'o gan' gosonxene' Baalen', Jehún' bsaque' cont bi goseçhiçe' bene' ca' chesonxen Jehová len ļegaque'. Nach bene' señw len soldadw çe' ca' ben' ba zjaze cue'ej cuit doxen yo'o gan' chesonxene' Baalen' cont ļegaque' goso'e gosote' yogo' bene' ca' zjandobe' lo' yo'ona', na' ļecze bosyoçhiņje' yo'on'. Can' ben Jehún' cont bene' Efraín ca' bich gosejnilaže' Baal.

Diosen' bebede' dan' ben Jehún' cont noch no bene' Efraín gosonxen ļgua'a ļsaca' çe Baalen' na' gože'ne' yetap xi'in diaža çe' yesaque' rey çe Efraín žinten xesoa gwyoņe'. Perw Jehún' bi bzenague' çe ley çe Diosen' len bichle da' bene', ļe gwyejnilaže' ļgua'a ļsaca' çe me' go'ņ dao' ca' dan' gosac de oro dan ben da' Jeroboam. Nach šlac gwnabia' Jehún' Diosen' be'e latje besežin bene' Siria ca' goseque'e doxen yežlio çe bene' Efraín ca' dan' gota' šļa'a yegw Jordán gan' chla' gwbižle. Jehún' gwnabi'e Efraínņa' xonechoa iz, na' cate' gote' xi'ine' Joacaz gwdie' blane' xlatje'.

115. Atalía na' Joás gosenabi'e nación çe Judá

(2 Reyes 11 — 12; 2 Crónicas 22:10 — 24:27)

Atalía, no'olen' goc xo'ole da' rey Joram na' xņa' rey Ocozías, cate' gwņezde' Jehú ba betue' bi' çhen' ben' goc rey çe Judá, beçhoglaže' yoņit yoļane' yogo' bene' byo zjanac diaža çe da' rey David cont

nabia' cuine' na' nono tie' gwłane' xłatje da' bi' ċhen'.
Da'nan' bene' mandadw gosote' yogo' bene' ca'. Perw
gwzoa to bi' ċhe Joram, no'ol gože' Josaba na' bcuaše'
to bi' xi'ine' bi' gože' Joás, nacbe' xi'in da' rey
Ocozías. Na' Josaba len bene' ċhe' Joiada, ben' goc
bħoz blao, bosocuaše'be' txen len to no'ole bosgole'be'
bagaše'ze to lo' cuart dan' gwzoa cuit yodao' blaon'.
Ca tiempa' nacbe' bidao' riz.

Na' Atalía gwnabi'e ħop iz ne ca gwneзде' še ne'
zoa bidao'na'. Cate' goque Joásen' gaž iz, zan bene'
ba nita' bene' bi chesazlaže' can' chon Atalían'. Na'
bħoz blao ben' gože' Joiada ben' bosgole' Joásen'
btobe' soldadw ca' ben' gosape' yodao' blaon' len bene'
gwnabia' ċhegaque' ca' na' blo'ede' legaque' Joásen'.
Nach gosone' yeła' güexi'a yosozoe'be' cont nabia'be'
gualaz Atalían'. Gosaxe' yogo'loł bene' ca' gosac diaža
ċhe da' Leví cont gosape' Joásen' na' goseċhe'ebe' lao
bene' yeža' cho'a yodaon'. Lecze bosozoe' to corona
yichjbe' na' bosozoe'be' cont nabia'be'. Nach gosone'
łni ċhebe' na' gosole' na' bosocuež güecuez le
besyebechğüede'.

Cate' bene Atalían' sšag ċhe güecuežen' na'
gwyeje' yodaon' jaņe'e bin' chac. Cate' ble'ede' ba
bosozoe' bidaon' cont nabia'be', blocchgüe' na' bosye'e
gwne':

—¡Ba chedabaga'le neda'!

Nach Joiada ben' goc bħoz blaon' bene' mandadw
yeseņiz soldadw ca' le' na' yeseċhe'ene' ga yoble ga
yeseote'ne'. Na' ca' gosone'.

Esta ilustración
no está
disponible.

**Bosozoe' to corona yichj Joásen' na' bosozoe'be' cont
nabia'be' gualaz Atalian'.**

Beyož gosote'ne', Joiada gože' Joásen' len yogo' bene' že' Judá cheyaļa' yesejnilaže' toz Jehová ben' nac dogualje Dios na' toz le' yesonxene'. Na' goseghebe' yesone' ca'. Nach ja'ac yogüe' gan' zoa to yodao' gan' gosonxene' lġua'a l̄saca' dan' nzi' Baal na' bosyočhinjen'. Lecze gosote' bene' ca' zjanac b̄xoz čhe Baalen'. Na' Joiada bzejni'ide' b̄xoz čhe Diosen' len yezica'chle bene' diaža čhe da' Levín' yogo'lol dan' ben Diosen' mandadw yesone' lo' yodao' blaon' can' bzoj da' Moisésen'.

Can' goc gwnabia' Joásen' nación Judá, na' zan iz Joiada goclene'ne' cont gwzoacze' benxene' Diosen'. Na' šlac gwnabi'e b̄chixjue' bene' gualaž čhe' ca' late' gŷeje cont gota' da' b̄chine' beyonšagüe' yodao' čhe Diosen'.

Perw cate' got Joiadan', gwnita' baļ bene' blao Judá ben' gosego'oyeļe' Joásen' cont benxene' lġua'a l̄sacan' txen len l̄gaque'. Na' Diosen' gwseļe' ben' goso'e xtižen' gose'e l̄gaque' cheyaļa' yesonxene' toz Dios na' bi cheyaļa' yesonxene' lġua'a l̄saca' ca', perw bi bosozenague' čhegaque'. To ben' gwseļa' Diosen' gože'ne' Zacarías ben' goc xi'iŋ Joiada. Zacarías gože' l̄gaque':

—Chonļe gŷedenag len ley čhe Diosen' na' dan' chonļe ca' gata' da' zed čhele. Na' da' ba gwlejyičhje Dios, Diosen' cuejyičhje' le'e.

Perw Joásen' bi gwyazlaže' can' gwnen' na' bene' mandadw yesote'ne' yosotacue'ne' yej cho'a yodaon'. Bi jayze'ede' yogo' da' gŷen dan' ben da' x̄a Zacaríasen'

can' goclenchgüe' le' šlac ne' mbane'. Diosen' bi gwyazlaže' dan' betue' Zacaríasen', da'nan' bene' cont bene' Siria ca' ja'aque' jasedilene' bene' Judán'. Bene' Siria ca' gosote' yogo' xan soldadw che nación Judá, na' la'czla' bi gosote' rey Joásen', bia'cze goque' güe' lo gwdiljen'. Na' šlac die' žie' güen' chope bene' ca' chesone' xšine' da' zaca' gosote'ne' dan' bi gosazlaže' can' bene' betue' da' Zacaríasen'. Ba goc choa iz zoe' chnabi'e nación Judá cate' gote', na' beyož goten', xi'ine' Amasías gwdie' blane' xlatjen' gwnabi'e.

116. Joel be'lene' bene' Judá ca' xtiža' Diosen'

(Joel 1 — 3)

Bžin ža cate' Diosen' gwsele' be zan biše'zo be gosagwba' yogo'lo! da' gosaz bene' Judá ca'. Bosyonitteczeba' yogo' yiže' cuan na' bica'ch da' gosaze' na' bibi gota' da' yesagüe'. Diosen' lecze bene' cont bi goc yejw. Perw gwsele' to ben' gože' Joel bzejni'ide' legaque' bixchen' chesac da' ca' dan' chesezaca'zi'en. Gože' legaque':

—Le'e nacle bene' gole blao na' note'tezechle, le gwzenag xtižan'. Da' li chacchgua yela' yaše' yela' zi' checho. Ba gwžiayi' yogo'te dan' gozcho, na' bibi cosešen' gata' da' yotobcho. Yogocho cheyala' nabecho Diosen' gaclene' chio'. Neca de no trigw, no cebada ca dan' cheyala'cze gwnežjwcho cate' gonxencho Diosen'. Bačhlja za' gon Diosen' juisyw. Perw še yezolaole gonxenlene' na' yetinjele xtoła'len' na' yegüine'le che da' xinj da' benle, nach Diosen'

yezi'xene' c̄hele na' gonlje' cont gac coseš c̄helen' da' yoble. Diosen' naque' bene' šagüe' na' bene' xenlaže'. Bi nacho chbede' dan' chžaglaole, san chaclaže' yetinjele xtoła'len'. Da'nan' le'e nacle bene' gole blao le'e chnabia'le, le yotob bene' yežen' cont goncho gwbas cont gwlo'echo Diosen' ba chegüine'cho c̄he da' xinj da' bencho, na' yolgüižchone' cont yezi'xene' c̄hecho.

Gosone' çan' gož Joelen' legaque' na' Diosen' bene' cont besyenit biše'zo ca'. Lecz Diosen' gwne' gone' cont gacchgua coseš c̄hegaque' na' yezoalaze' coseš c̄he izen' ba gosede. Na' gwne' cate' ba goc ca' na' yesonxene' le' neçe dan' bene' goclene' legaque'.

Nach Diosen' gwlo'o cho'e gože' legaque' žin ža cate' sele' Spiritw c̄hen' gaclenen yogo' beñaçh na' gone' cont yesac da' yesyebane bene' da' yesele'ede' lo yežlion' na' le'e yaban' cont yesacbe'ede' zoacze'. Gože' legaque' gac ca' cate' ba zoa gac juisyw. Caten' gac ca' note'tez bene' yosolgüiže' Diosen' yesenabe' gaclene' legaque', Diosen' yebede' gaclene'ne' cont bi yesezaca'zi'chgüe' dan' za' gac. Na' gwduxjue'ede' legaque' žin ža cate' beñaçhen' yesežaglaochgüe' da' yoble na' bene' c̄he nación Judá yesasłase' do nación zito', perw tena' yesyeyac güen c̄hegaque' da' yoble. lecze gwne' Diosen' gwnežjue' castigw c̄he bene' ca' yososaca'zi'e bene' Judá ca' na' gone' yela' justis c̄he yogo' yež na' yogo' nación na' yesezaca'zi'e c̄he da' xinjen' da' ba gosone'. Nach gwne' cana' gone' cont ciuda Jerusalén dan' nac la'zelaogüe ciuda blao c̄he Judán' gaquen lo ne'e na' gapši'e bene' Judá ca'.

117. Diosen' gwsele' Jonásen' gwdixjue'ede' xtižen' len
bene' ca' že' Nínive

(2 Reyes 14:25; Jonás 1 — 4)

Gwzoa to bene' gože' Jonás na' Diosen' gože'ne' šeje' ciuda Nínive da' nacch ciuda blao ga mbane Asiria cont šjatixjue'ede' bene' ca' zjanita' na' Diosen' gone' cont cuiayi' ciuda Nínive dan' chesonchgüe' da' xinj. Perw Jonásen' bi goclaže' šeje'. Gualaz da' gwzenague' che Diosen', bene' xbab gwcuaše'de' le, nach jašo'e to lo' barcw da' zej ga yoble. Perw gwneze Diosen' gan' zej Jonásen' na' bene' cont gwyechj to be' gual lo' nisdaon' na' chas chata' goc nisdaon'. Bene' ca' goseže'e lo' barcon' besežebchgüe' gosacde' yochinjen barcon' o šož nisen' lo'enna' na' yesebiaye'e. Nach gosone' rifa cont gosenезде' noe' nape' doļa' dan' chac chegaque' ca', na' bchojni'an Jonásen' nap doļa'. Nach gosenabde'ne' bi da' mal ba bene'. Nach Jonásen' gože' legaque':

—Nezda' chac ca' dan' chxonjda' Dios.

Lecze gože' legaque' cheyaļa' yosozale' le' lo' nisdaon' cont yeyatažin perw bi gosaclaže' yesone' ca'. Cate' gosacbe'ede' ba chyaļa'chen, na' bich chaclen bite'tezchle da' chesone', žan ca žan bosozale' Jonásen' lo' nisdaon'. Nach la' gwlezte ben' bich gwyechjen na' la' beyatažite nisdaon'. Na' yogo' bene' ca' goseže'e lo' barcon' gosacbe'ede' nacchgua Diosen' bene' zaca'.

Na' ca nac Jonásen', Diosen' gwsele' to beļ ban xen be gwdebba' le' cont bi gote' lo' nisdaon'. Na' bega'ane' lo' le'e beļen' šone ža šone yel. Šlac yo'e lo' le'e beļen', Jonásen' boļgüiže' Diosen' na' be'e yeļa' choxcġen che' dan' bosle' le' cont bi gote'. Nach Diosen' bene' cont beļen' gwyejba' cho'a nisdaon' beyebba' le' na' bechoje' gan' nac yo biž.

Beyož bechoj Jonásen' lo' le'e beļen', da' yoble Diosen' gože'ne' cheyaļa' šeje' Nínive. Cana'ch Jonásen' bzenague', na' gwyeje' ježe' bene' ca' can' gwna Diosen'. Gože' legaque':

—Yečhoa žaze na' Diosen' gwžiaje'e ciuda chele nga.

Na' bene' Nínive ca' cate' gosenezde' can' gwna Diosen', gosacyaše'chgüede'. Rey chegaquen' gože'ne' yogo'cze' cheyaļa' yesone' txen yesone' gwbas na' yesenabde' Diosen' yezi'xene' che da' xinġ ca' ba gosone'. Nach yogo'cze' gosone' gwbas na' gosenabde' Diosen' yezi'xene' chegaque'. Cate' Diosen' ble'ede' ba besyetingde' xtoļa'gaquen' bečhoglaže' bich gwžiaje'e ciuda chegaquen'.

Perw Jonásen' bže'e dan' bezi'xen Diosen' che bene' Nínive ca', le' godde' con bene' Israel ca'ze zjzaque' cont Diosen' gone' güen len legaque'. Na' gože' Diosen':

—Gocbe'eda' yezi'xeno' chegaque'. Da'nana' bxonja' jašo'a lo' barcw dan' zej ga yoble. Nežda' naco' bene' šagüe' na' chezi'xeno' che bene' chesenab goclen laguo'. Na' neda' chaclaža' gwžiajo'o bene' Nínive

quinga, le ba gosone' da' zan da' xinj. ¡Leca chloca!
¡Yejni'a gata' clel ca soacha' le'echda' gono' güen len
bene' quinga!

Nach Diosen' gože'ne':

—Chona' da' zej to licha da' chona' güen len
bene' quinga na' nacczen güen dan' bezi'xena'
çhegaque', le cheyaše'da' bene' chesyetinje xtoła'gaque'.

118. Bene' ca' gosenabi'e nación çhe Efraín

(Amós, Jonás, Oseas)

Yogo'cze rey ca' bene' gosenabi'e Efraín gosaque'
bene' güedenag len Diosen'. Yogo'cze' gosejnilaže'
lgu'a' lsaca' çhe me' go'n dao' de oro dan' ben da'
Jeroboam na' gwnita'ch lgu'a' lsaca' da' gosejnilaže'.
Da'nan' Diosen' gwsele' bał bene' goseyixjue'ede'
xtižen' len legaque' na' bososnisde'ne' yesezaca'zi'e
neche da' xinj dan' chesone', perw bi besyetinjde'
xtoła'gaquen'. Diosen' gwsele' ben' gože' Amos, na'
ben' gože' Jonás, na' ben' gože' Oseas, gosoe'lene'
legaque' xtižen', perw bicze bosozenague'.

119. Jotam na' Acaz gosenabi'e Judá

(2 Reyes 15:32 — 16:20; 2 Crónicas 27 — 28;

Isafas 7:1 — 9:7)

Bał rey ca' bene' gosenabi'e Judá bosozenague'
çhe Diosen' na' yebałe' gosejnilaže' lgu'a' lsaca' na'
gosego'oyełe' bene' ca' že' gan' zjambande' cont lecze

gosejnilaže' lġua'a l̄saca' ca' na' gosone' bichle da' bi
chazlaže' Diosen'.

Beyoż got rey ben' gože' Uríasen', xi'ine' Jotam
gwdie' bołane' xłatje', na' Jotam bene' da' güen lao
Diosen'. Na' da' bzenague' che ley chen', Diosen'
goclene'ne' cont gocch nación chen' da' gual. Da'nan'
bene' zito' ca' zjanzi' amonitas bi gosezoede' lęaque'
lo gwdiłe. Nach Jotanna' bene' ze'e xen da' gwyechjen
ciuda Jerusalén da' gualch na' lecz ca' bene' len
bichle ciuda ga mbande' con can' bencze da' xen'.
Jotanna' ba gwnabi'e šino'to iz cate' gote', nach bi'
che', ben' gože' Acaz, gwdie' bołane' xłatje' gwnabi'e.

Acazen' gocchgüe' bene' güen da' xinj. Ne late'ze
bi bzenague' che Diosen'. Toz ca da' mal bene' len
da' ca' goson rey ben' gosenabi'e Efraín. Lente bi'
che' ca' jasane' to lo lġua'a l̄saca' bzeye'be' benxenen'.
Da'nan' Diosen' be'e latje ja'ac bene' Siria na' bene'
Efraín ca' jasedillene' bene' Judá ca', na' gosonchgüe'
xya len lęaque'. Na' bene' Efraín ca' gosezene' bene'
zan bene' Judá na' goseche'ene' lažgaque' pres. Perw
Diosen' gwsele' to bene' cho'e xtiže', ben' gože' Obed,
na' gože' lęaque' cheyała' yososane' bene' Judá dan'
zjanaque' biše' lježgaque', le bene' Efraín lente bene'
Judá gosaque' xi'in diaža che da' Abraham. Na'
bososane' lęaque'. Lecze šlac gwnabia' Acazen' bene'
Edom ca' gosedabague' nación Judá.

Nach to ža bene' Siria na' bene' Efraín ca'
gosezolagüe' chesedillene' bene' Judán' da' yoble na'
gosezechje' ciuda Jerusalén. Perw Diosen' gwsele' ben'

gože' Isaiás be'lene' Acazen' diža' cont bi žebe' bene'
Efraín na' bene' Siria ca', gože'ne':

—Diosen' že' gape' ciuda Jerusalénna' cont bibi
gac chele da' nga na'a. Do yegayon gayo' iz na' yenit
nación Efraín. Nach to no'ole güego' sane' to bi' byo
dao' na' yososi'ebe' Emanuel, zeje diža': zoacze Diosen'
len chio'. Na' bina' šejni'ibe' par nezebe' bin' nac da'
güen na' bin' nac da' mal cate' Diosen' gone' cont
nación Asirian' yoniten chopte nación ca', Siria len
Efraín. Na' Diosen' lecze seje' to bene' galje' lo diaža
che da' rey David nabi'e Judá. Na' binlochgua
yesenita' bene' cate' ba chnabi'e, le gaque' to bene'
šagüe' to bene' gone' da' zej to licha, na' nabi'e bene'
zan juisyw.

Rey Acazen' bi gweyje'e che Isaiásen'. Na'
gualaz da' nabde' Diosen' gaclene' legaque', gweyje'
janabde' Tiglat-pileseser rey che bene' Asiria ca'
gaclene'ne' tillene' bene' Efraín na' bene' Siria ca'. Na'
gwseje' mechw na' yogo' da' zaca' da' zjango'ošagüe'
lo' yodao' che Diosen' cont gaclen rey le'. Tiglat-
pileseser jatillene' bene' Siria ca' na' bene' legaque' gan
na' betue' rey chegaque'. Perw la'czla' goclen bene'
Asiria ca' bene' Judá lo gwdilen', bi bchojen güen, le
bene' Asiria ca' gosonchde' bene' Judan' malch clel ca
can' goson bene' Siria na' bene' Efraín ca'.

Gwdena' gweyje' Acazen' Damasco da' nacch ciuda
blao che nación Siria jane'e rey Tiglat-pileseser ben'
chnabia' Asiria, na' šlac zoe' na' ble'ede' to mes da'
chosočhin bene' gan' chosozeye' beyixe' cate'

chesonxene' l̥gua'a l̥sacan' chesejnilaže', na' Acazen' gwyo'olažen'. Na' gože' to b̥xoz ben' zoa Judá nacyan̥en' naquen cont gone' to che' dan' nac ca'. Nach Urías bene' mandadw gosone' mesen' na' Acazen' bene' mandadw bosog̥hin b̥xoz che Diosen' l̥en cate' bosozeye' beyix̥e' lao Diosen' t̥ža t̥ža. Da'n̥an' bich bosog̥hine' mes dan' ben rey Salomón. Na' bitw goc s̥ša cate' Acazen' bseyjue' yodao' blao che Diosen' na' bcueze' dan' chosozeye' beyix̥e' cont chesonxene' Diosen' cho'a yodaon'. Bene' mandadw gosone' zan latje gan' gosonxene' l̥gua'a l̥saca' ca' lo ciuda Jerusalén. Cate' beyož gwnabi'e šino'to iz, cana' gote' na' bi' che' ben' gože' Ezequías gw̥die' bl̥ane' x̥latje'.

120. Isafas na' Miqueas goso'e xtiža' Diosen'

(Isafas 9:8 — 12:6; Miqueas 1-7)

Zan ni'a Diosen' gwsele' bene' ježe' bene' Efraín na' bene' Judá ca' cheyała' yesyetinj̥de' xtołen', yesebejyich̥je' l̥gua'a l̥saca' ca' chesejnilaže', na' yesonxene' toz Dios. Perw bi gosac̥laže' yosozenague'. Nach Diosen' bene' cont gocchgua yela' zi' chegaque' lo gw̥dile len nación ca' zjaže' do na'.

To ben' gwseła' Diosen' be'lene' legaque' xtižen' gose'e le' Isafas. Be'lene' legaque' diža' che castigw da' gwnežjo Diosen' legaque' neche da' xin̥jen' chesone', na' lecze gože' legaque' žin ža cate' Diosen' sele' to bene' galje lo diaža che da' rey David cont yedenabi'e binlochgua. Gwne' Spiritw che Diosen' soan len bena' sełen' cont gacchgüe' bene' sina' na' bene'

šagü'e, na' gone' da' zej to licha len yogo' bene'.
 Doxen yežlion' yeyaquen mba na' bich bi gata' da'
 gon xya o da' gwžiayi' benačhen'. Na' cate' ba
 chnabi'e, yogo'lo! bene' yesombi'e can' ža Diosen'. Na
 bene' ca' že' yogo' nación yesežine' Jerusalén yeso'e
 yela' bala'an che bene' gwnabia' nan'. Lecz cana'
 yogo' bene' Israel ca' ben' ba zjanaslas ga yoble
 yesyežine' yesenita' lažgaque' da' yoble, bene' Judá len
 bene' Efraín. Cana' yesaque' toz nación da' yoble, na'
 txen yeso'e yela' choxcen che Diosen'.

Yeto bene' gwseja' Diosen' ben' be'lene' bene'
 Judá na' bene' Efraín ca' xtižen' gose'e le' Miqueas.
 Gwdi'e legaque' che da' xinjen' chesone' na' be'lene'
 legaque' diža' che yela' zi' da' za' gac chegaque' neche
 da' xinjen' chesone'. Gože' legaque':

—Diosen' gone' cont bene' zito' yedetiłlene' le'e
 na' yosožiaye'e ciuda blao chele ca', ciuda Samaria na'
 ciuda Jerusalén. Gac ca' le le'e bene' Israel bi chonle
 da' zej to licha na' bi chonxenle Diosen' do laže'le.

Miqueas lecze gože' legaque' yeyož yesezaca'zi'e
 che da' mal dan' chesonen' na' žin ža cate' gac güen
 chegaque' da' yoble. Gwne':

—Žin ža cate' ya'a gan' zoa yodao' blao che
 Diosen' gacchen da' blaoch clel ca' bite'tezchle ya'a lo
 yežlion'. Na' bene' že' doxen lo yežlion' yesežine' na'
 cont yesenezde' bin' chaclaže' Diosen' yesone'. Cate'
 žin ža gac ca', bich bi gwdi'e gata' lo yežlion', le
 yogo' bene' yesenite' binlo len ljež benače'. Lecz
 cana' gon Diosen' cont yogo' bene' Israel gualaž

checho ca' ba zjanita' nación zito' yesyele'e
yedyesyenite' lažcho nga da' yoble. Cana'ch nación ni
yeyaquen da' blao da' yoble. Na' yež dao' da' nzi'
Belén dan' chi' gan' že' bene' ca' zjanaque' diaža che
da' ben' gože' Judá, lo yežna' galje to bidao' gacbe'
bene' gwnabia' na' nabi'e yogo' bene' Israel.

121. Nación dan' nzi' Efraín beniten

(2 Reyes 14:26-29; 15:8-31; 17)

Gosenita' yezan rey ben' gosenabi'e nación Efraín,
bene' qui gose'ene' Jeroboam II, Zacarías, Salum,
Manahem, Pekaía, na' Peka, na' yogo'cze' gosejnilaže'
lġua'a lřaca' che me' go'n ca' dan' gosac de oro dan'
ben rey nechw chegaque' ben' gose'e Jeroboam. Na'
zane' gosone' txen len bene' zito' ca' gosenita' do na'
na' gosonxene' yezan lġua'a lřaca' da' gosejnilaže' bene'
ca'.

Ben' gože' Oseas gwnabi'e ga iz, na' ľecze goque'
bene' mal la'czla' bi bžinlaže' yela' mal che' len da'
mal da' goson reyen' gosenita'. Šlac gwnabi'e,
Salmanasar rey che Asiria gwdiłlene' nación Efraín na'
bene' byen goseyixjue'ne' mechw. Nach Oseasen'
gwsele' rson len rey che Egipton' chnabe' gaclene' le'
na' bsane' bich gwđixjue' mechw dan' chnab bene'
Asirian'. Cate' gwneze Salmanasaren' bich chaclaže'
Oseasen' chixjue' mechon', nach gwlo'e Oseas ližya na'
soldadw che' ca' goseghjde' ciuda Samaria dan' nacch
ciuda blao ga mbane Efraín, bi goso'e latj yesechoj
bene' Samaria lo ciudan'. Ca goc šon iz na'

gosebanden' na' goseči'e yogo'lo! bene' Efraín ca' Asiriale, na' bnite' legaque' to to yež Asiria. Can' goc benit nación Efraín, Oseas na' goc rey bzeb che naciónna'.

Diosen' bi'e latje goc dan' nac qui che bene' Efraín ca', le legaque' bi bosozenague' che ley chen'. Gosonxene' da' bi nac dogualje Dios na' gosone' latje ga gosote' beyixe' cate' gosonxene' da' ca'. Gosone' yogo' da' mal dan' goson bene' cananeos ca', le neche da' malen' zjanac ca' bebej Diosen' legaque' yežlio gan' nzi' Canaán na' bnežjuen' bene' Israel ca'. La'czla' Diosen' gwsele' bene' gosoe' xtižen' gosata'yoede' bene' Efraín ca' yososane' bich yesone' da' malen' na' yosozenague' che' da' yoble, legaque' bi gosaclače' yosozenague' che'. Gosone' chop me' goŋ de oro be gosonxene' na' gosot xi'ingaque' bosozeye'be' cont gosonxene' da' bi zaca' yesonxene'. Lecze jasene'e bene' chbej cuent. Yogo' da' quinga gosone' zjanaquen mal. Da'nan' bloc Diosen' legaque' na' bene' cont benit nación chegaquen'. Yešinga nación Judá bga'an la'czla' ne legaque' bi bosozenague' doxen can' goclače' Diosen' yesone'.

Nach rey che Asirian' jaži'e bene' nación yoble gosenite' gan' goc nación Efraín. Na' bene' qui zjano'e lgua'a lsaca' dan' chesonxene' lažgaque' gan' gosa'aque' perw lecz gosacde' cheyała' yesonxene' Jehová ben' nac Dios che bene' Efraín ca'. Da'nan' rey che Asiria gwsele' to bχoz ben nac bene' Efraín len legaque' bene' neze nac cheyała' yesone' yosonežjue' beyixe' yesonxene' Jehová ben' nac dogualj

Dios cont blo'ede' legaue'. Perw Diosen' bi gwyazlaže' can' goson bene' quinga da' gosonxene' le' na' lecze gosonxentie' lgua'a lsaca' cħegaue' ca'.

122. Ezequías gwnabi'e lao nación Judá

(2 Reyes 18 — 20; 2 Crónicas 29 — 32; Isafas 36 — 39)

Ezequías ben' goc xi'in rey Acaz gwnabi'e lao nación Judán' na' goque' to rey güen. Bzenague' cħe ley cħe Diosen' na' boçhinje' da' zan latje dan' goson bene' Judá ca' gan' jasesane' beyix'e cate' gosonxene' da' bi zjanac dogualje Dios. Lao iz nechw dan' gwnabi'en bene' byen bocobe' dan' chesonxene' Diosen' can' bžia bia' Diosen' yesone', le rey ca' ba gosede' bosoxinje' can' gosonen'. Beyonšagüe' puert cħe yodaon' na' lecze gože' bħoz ca' len yezica'chle bene' gosalj lo diaža cħe da' Leví cheyaļa' yesone' yogo'loļ dan' chesonen' binlochgua, le Diosen' ba bsaca'zi'chgüe' bene' Judá ca' dan' biņa' yesone' da' nžie' bia' yesone'. Nach bene' ca' gosalje' lo diaža cħe da' Leví gosone' can' gwna Diosen' cheyaļa' yesone' cont besyeyaue' xilaže' len le', besyešaše' yogo'loļ da' bi cheyaļa' yeseže'e lo' yodaon' na' bosyocua'šagüe' yogo'loļ da' cheyaļa' yesyecua'šagüe' con can' gwnalaže' Diosen' gaquen. Benen byen gosone' yogo' da' ca', le da' rey Acaz bša'tecze' yogon' šlac gwnabi'e. Cate' beyož bega'an yodaon' binlo nach Ezequíasen' bene' mandadw len bħoz ca' yesote' beyix'e neçhe xtoļa'gaue' na' lecze yesote' beyix'e cont yesonxene' Diosen'. Nach bzoe' bene' gosalj lo diaža cħe da' Leví cont gosone'

žin con can' bencz da' rey David mandadw. Na' da' yoble bosochine' yodaon' con can' bžia Diosen' bia'.

Nach Ezequíasen' goxe' yogo'loł bene' Judá na' bene' Efraín ca' cont šja'aque' šjasene' lni dan' nzi' pascw. (Goc da' nga cate' bina' yenit nación che Efraín.) Bina' gac ca lni xen dan' goca', le yogo'loł bene' Judá ja'ac. Perw bene' Efraín, con to chopga bene' ca' ja'ac, na' bene' ca' yezica' gosonlale' che lnina'. Šlac chac lnin', bene' ca' besežaga' ja'aque' na' jasyechinje' yogo'loł latje lo ciuda Jerusalén gan' jasesane' beyixē' gosonxene' da' bi nac dogualje Dios. Na' bega'an toz latje dan' gota' chyo'o yodaon' gan' jasesane' beyixē' cate' gosonxene' dogualje Dios. Lecze bosyochinje' latje gan' bosozeye' yal cho'a yegua', le Diosen' gože' legaque' cheyała' yesonxene' toz le' na' cheyała' yesonxene' le' ga zoa yodao' che'. Bał bene' gosenite' lo lnina' bina' yesyeyaque' xilaže' lao Diosen', perw Ezequíasen' gwñabe' lao Diosen' cont bezi'xene' chegaque' le legaque' gosacłaže'chgüe' yesonxene' Dios. Cate' gwde lnin', bene' ca' besežaga' ja'aque' yež ca' zjachi' doxen Judán' na' bosyochinje' yogo'loł latje da' besyeželde' gan' gosonxene' da' bi nac dogualje Dios, na' lecze ca' gosone' bał yež da' zjachi' Efraín. Beyoža' che che' jaya'ac ližgaque'. Rey Ezequíasas' gwzoachcze' jasesane' lao Diosen' dan' cheyała' gwnežjue' le' na' bene' byen goson bxož ca' na' yezica'chle bene' gosaljē' lo diaža che da' Leví yogo'loł dan' gwna Diosen' cheyała' yesone' lo' yodaon'. Na' Diosen' bebede' can' ben rey. Da'nan' bene' ga gwzoachgüe' binlo.

Šlac Ezequíasen' gwnabi'e lao nación Judan', lecze cana' rey Salmanasar chnabi'e nación che Asiria. Na' Salmanasaren' len soldadw che' ca' gosediłlene' bene' Efraín ca' na' bosožiaye'e Samaria dan' gocch ciuda blao gan' mbane Efraínna' na' goseche'e lažgaque' yogo'loł ben' gosenita' na'. Gwde ši iz cate' ba got Salmanasar, yeto rey gwzomagüe' gwnabi'e bene' Asiria ca' ben' gože' Senaquerib. Benga bene' gwdiłe len nación che Judán' na' gwzene' ben' goseže'e yogo'loł yež dao' ca'. Yetoz Jerusalénna' bi gwzoczdde'. Ezequíasen' gwchebe' chixjue' mechw xen cont yeyacxenlaže' rey Senaquerib na' bi tiłlene' legaque'. Na' bnežjue'ne' yogo'loł mechw da' gota' checze' na' lecze ca' da' gota' gan' gosego'ošagüe' xmechw yodaon'. Leczbe beque'e no oro da' dop do le'e puert yodaon' cont bse'e mechw dan' cheyała' chixjue'. Perw Senaquerib bi bene' banez len yogo' da' quinga na' gwsele' to chop bene' gwnabia' chen' ca' bene' güede diža', jaseže' Ezequíasen':

—Bit gac gono'nda' gan lo gwdiła' še che'ndo' tabago'nda'. Na' še nabo' gaclen bene' Egipto ca' le', bi gac yesaclene' le'. Neca Dios chion' ben' chonxeno' gaclene' le', le ba bochinjo' xlatje' ca' gan' benxenlene' cana'.

Beyož gose'e rey Ezequíasen' xtiža' Senaqueriba', nach bene' ca' gwsełen' bososye'e gose'e bene' Jerusalénna':

—Qui ža Senaquirib: "Bi šejle'le che rey Ezequíasen' cate' che'e le'e šejnilaže'le Dios chen', le

Dios chen' bi gac yebeje' le'e lo na' neto' bene' Asiria. Neto' ba bento' gan zan nación, na' da' ca' gosejnilaže' bene' ca' bi gosac yososlán legaque' lo na'to'. Quinga cheyała' gonle, gon cuinle lo na'to' na' ca' guac soale binlo žinte ža yidto' che'eto' le'e šjasoale nación yoble."

Na' bene' Judá ca' ne to nono boži'i xtiža'gaquen', le Ezequíasen' ba gože' legaque' bi yosyoži'en. Nach Ezequíasen' gwyeje' yodao' che Diosen' na' gwsele' bene' jasesane' rson can' ba goca' lao ben' be' xtiža' Dios ben' gože' Isaías, na' Isaíasen' boži'en gože'ne':

—Senaqueriben' yende' yesene' de to da' zed lo nación chen'. Neche da'nán' yebi'e yeyej liže' na' gague gac sša cate' gate'.

Can' goc besyebi'i bene' ca' gwseła' Senaqueriben' Jerusalénna'.

Gwde to tiemp Senaqueriba' gwsele' bene' jasesan rsonna' da' yoble. Perw na'a zjanoxe' to cart na' le'e carta' žan con can' gosena ben' jasesan rsonna' da' nechw. Ca beyož blab Ezequíasen' carta' gwyeje' yodao' che Diosen' bolgüiže'ne' na' gwⁿabde'ne' yosle' nación Judán' lo na' rey che Asiria cont yogo'ze bene' yesenezde' len' naque' dogualje Dios ben' zaca' gonxenko. Isaíasen' gwsele' rson da' yoble gože' Ezequíasen' ba boži'i Diosen' xtižen' na' gože'ne' bene' Asiria ca' neca šja'aque' šjasedillene' bene' Jerusalénna'. Lo že' na'teze Diosen' gwsele' to angl chen' jetoe' yogo'ze bene' Asiria ca' ben' chja'ac lo gwdiļe. Beyoža' rey Senaquerib bebi'e bežine' Nínive

dan' nac ciuda blaoch gan' mbane nación çhen'. Na' zoe' cate' çhop xi'ine' ca' gosote' le'. Na' yeto xi'ine' ben' gože' Esarhadón bołane' xlatjen' goque' rey çhe Asiria. Goc doxen can' gwna Diosen' gac caten' gwsele' Isaíasen' jasane' rsonna' lao Ezequíasen'.

Gwde yeto tiemp, rey Ezequías gocšenchgüede'. Nach Diosen' gwsele' Isaíasen' ježe'ne' ba zoa gate'. Perw Ezequíasen' bolgüiže' Dios gwñabde'ne' šjayze'ede' can' ba gwzoateze' benxene' le' do yiçhj do laže' šlac mbane'. Nach Diosen' bene' mandadw len Isaíasen' yebi'e na' šjayeže' Ezequíasen' le ba bzenague' caten' gwñabe' yeyacde'. Da'nan' güe'e latje bane' yešino' iz. Ezequíasen' bebecchgüede' na' bzojtie' to da' gosole' cont be'e yeła' choçcledn çhe Dios.

Cate' Merodac-baladan ben' goc rey çhe nación Caldea bende' Ezequíasen' ba güe'ede', na' gwsele' to da' zaca' çhe' len to çhope bene' Caldea ben' jasesan len. Na' cate' za' yesyebi'i ben' jasesan dan' gwseła' Merodac-baladan çhe Ezequíasen', reyen' blo'ede' legaque' yogo'lol bica' da' de çhe' da' zjazaca'chgua na' da' ca' zjanac xdan. Nach Isaíasen' gože'ne' žin to ža cate' soldadw çhe bene' Caldea ca' yeso'e yogo'lol bica' da' zaca'chgua da' de Jerusalénna' yesyeyo'en ciuda Babilonia da' nacch ciuda blao gan' mbane Caldea na' lecze to çhop bi' çhen' yesacbe' bene' xmos rey çhe Caldean'. Perw Ezequíasen' bi' gocdebde' len dan' nga, le bene' xbab con še bibi gac šlac mban le', jayešaz bi da' gac techle. Na' cate' Ezequíasen' ba gwnabi'e gachoa iz, nach gote', na' xi'ine' ben' gože' Manasés bołane' xlatjen' goque' rey.

123. Caten' gosenabia' Manasés, Amón na' Josías lao
nación Judá

(2 Reyes 21:1 — 23:30; 2 Crónicas 33 — 35;

Jeremías 1 — 6)

Manasés xi'in rey Ezequías gwnabi'e lao nación
Judá na' goque' to rey güen da' xinj. Da' xen'
boçhinje' yogo'loł latje gan' jasnene' lgu'a' lsaca' ca'
pero Manasésen' beyone' da' ca' na' gwzologüe'
chonexene' yogo'loł dan' gasonxen bene' Canaán ca'.
Lecze bene' da' zan mes che lgu'a' lsaca' ca' lo'
yodao' Jerusalén na'teze. Na' bzeye' to bi' çhen'
benxene' to da' bi' nac dogualje Dios. Lecze janabe'
rson len bene' ca' cheseneya'a, len bene' guaža' na'
len ben' bosolgiüiž bene' guat. Na' dan' bene' ga gason
yogo' bene' Judán' da' quinga, Diosen' blocchgüe' le'.

Neche da' mal dan' ben Manasésen', Diosen'
gwsele' ben' goso'e xtižen' len bene' Judán'. Quinga
gosene':

—Dan' ba ben Manasésen' nacchen da' malch clel
ca dan' gason bene' Amorreos ben' gosenita' latje nga
cani'te. Lecze ba bene' cont chesonxen bene' Judán'
da' bi' zjanac dogualje Dios. Da'nán' ba gwna Diosen'
gone' ga yesac da' zan da' mal doxen naciónna' na'
lentece Jerusalén gan' nac ciuda che Dios. Na' güe'e
latje ben' chesegüe'e le'e yesone' le'e gan na'
yosyoçhinje' ciuda Jerusalénna'. Bene' že' doxen nación
nga bia'cze ba gosone' da' xinj na' ba bosoloque'

Diosen' gosezolagüe' cate' besyechojtie' Egipton'. Ba
goc zan gayoa iz na' ža na'aža ne' chesone' ca'. Perw
Manasés nga ba benche' da' xinj clel ca yogo'lol bene'
ca' yezica'chle. Da'nan' Diosen' gone' cont
saca'zi'chgüe'.

Ca nac bene' Judá ca', bi bosozenague' che ben'
goso'e xtiža' Dios. Da'nan' Diosen' bi'e latje gosezen
xan soldadw che bene' Asiria ca' Manasésen' na'
goseche'e le' yeto ciuda yoble ga gwzaca'zi'chgüe'.
Šlac zoe' na' bolgüiže' Diosen' gože' le' zoayaše'chgüe',
le chache'ede' che yogo'lol da' xinj dan' ba benen'.
Nach Diosen' bzenague' cate' bolgüiže'ne' na' bnežjue'
latje bežine' Jerusalénna' na' beyaque' rey da' yoble.
Can' goc gocbe'e Manasésen' Jehová nan' nac dogualje
Dios. Cate' bežine' Jerusalénna' bočhiñje' yogo' latje
dan' ba bene' gan' gosonxene' da' bi zjanac dogualje
Dios na' beque'e yogo'lol lgua'a lsaca' dan' zjada' lo'
yodao' che Diosen'. Beyoža' betue' beyixe' benxene'ne',
na' gota'yoechgüede' bene' Judá ca' yesonxene' ben' nac
dogualje Dios. Lecze beyončače' ze'e dan' nyečhj
ciuda Jerusalén na' gwsele' soldadw bene' yesyega'ane'
yesape' yezica'chle ciuda ca' dan' zjazoa ze'e gan'
mbane Judán'. Na' Manasésen' beyož gwnabi'e lao
šineyon iz na' gote' na' xi'ine' ben' gože' Amón
bolane' xlatjen' goque' rey.

Amónna' gwnabi'e nación Judán' čhop izga, na'
goque' to rey güen da' xinj, le benxene' yogo'lol
lgua'a lsaca' dan' benxen da' xen' cate' za' yeseche'ene'
pres. Na' da' gocchgüe' bene' güen da' xinj ca da' xe',
bał bene' goson žin zaca' che Amónna'



Besyeželde' to yid da' ndoben da' nac ca yiš na' le'enna'
nyoj ley ċhe Diosen'.

besyedabague'ne' na' gosote'ne'. Perw bene' yež ca' bi gosazlaže' can' gosonen' na' lecze gosote' ben' goson ca', nach bosyozoe' to xi'in Amón bin' gože' Josías gocbe' rey.

Josíasen' ne' nache' bidao' cate' gwzolaobe' chnabia'be', perw bembe' byen bsdbe' ley che Dios. Da'nan' gocbe' to rey güen. Bočhinje' yogo'lo! xlatj da' ca' gosonxen bene' gualaž chen' dan' bi zjanac dogualje Dios. Bočhinje' dan' gwnita' Jerusalén, doxen Judá na' nación Efraín. Lecze betue' yogo'lo! bχoz ca' ben' gosote' beyixe' gosonxene' da' bi zjanac dogualje Dios. Beyoža' goclaže' yeyacšagüe' yodao' che Diosen'. Nach gwsele' to čhop bene' cheson xšine' da' zaca' jasesane' mechw lao Hilcías ben' goc bχoz blao cont yeyacšagüe' yodaon'. Šlac bene' güen žin ca' chesyeyonšagüe' yodaon', Hilcíasen' bežeide' to yid da' ndoben da' nac ca' yiš na' le'enña' nyoj ley che Diosen' na' gwsele' lao reya'. Cate' bene Josías can' ža ley che Diosen', bžebchgüe' na' gwsele' to čhop bene' cheson xšine' da' zaca' jaseñabe' rson bin' gon Diosen' len nación chen'. Ja'aque' lao to no'ole ben' gwdiχjue'ede' xtiža' Diosen', no'ol ben' gože' Hulda. Josíasen' gocbe'ede' bene' Judá na' bene' Efraín ca' ba cheszaca'zi'e da' biña' yesone' can' ža ley che Dios dan' zjanyoj le'e dan' besyeželden'. Nach Hulda be'lene' legaque' xtiža' Dios gože' legaque' quinga:

—Diosen' že': "Gona' cont le'e zoale nación ni saca'zi'le yogo' cuen da' mal, le biña' gwzenagle ley čhian', san ba benxenle da' bi zjazaca' gonxenle. Perw dan' ba ben Josías can' ža ley čhian' na' ba bzenague'

xtižan' na' ba gocyasē'de' che yogo'loł da' mal dan' ba goson bene' Judán', bi gua' latje gac dan' nac qui šlac mban le'."

Beyož gož Huldán' legaque' can' gwna Diosen', bene' ca' cheson žin da' zaca' che reyen' besyebi'e jaseyeže' Josíasen' xtiža' Dios da' gwđixjue'e Huldán' legaque'.

Nach reyen' btobe' yogo'loł bene' lo' yodao' che Dios na' blabe' yogo'loł ley che Diosen' zižje. Na' gwchebe' lao Dios gone' ga zelao saque'de' cont gwzenague' che ley che' do yičhj do laže', na' lencze yogo' bene' ca' goscchebe' yesone' ca'. Nach Josías bene' mandadw yosyočhinje' yogo'loł lgu'a' lsaca' ca', na' šlac gwbane' bene' gualaž che' ca' gosote' beyixe' gosonxene' toz Dios. Ca' goc šino'šon iz chnabia' Josíasen' bene' lni da' nzi' Pascw na' gocchguan to lni xen.

Perw Diosen' ne' chlocce' bene' Judán' che yogo' da' mal dan' bxe Manasésen' na' bečhoglaže' gwžiaye'e nación Judán' can' bžiaye'e nación Efraínna'. Na' šlac chnabia' Josíasen' Dios gwsele' Jeremías ben' chyixjue'ede' xtižen' na' jatixjue'eden' len bene' Judán'. Jeremíasen' gwne':

—Diosen' že' le'e bene' Judá ba benle güedenag len le' na' ba benchgualē da' mal dan' ba benxenle lgu'a' lsaca' da' benzle. Da' xozxta'ole ca' gosonite' gosonxene' Diosen' latje dašen' cate' beyož bebeje' legaque' Egipto. Cana' Diosen' bsaca'zi'e note'teze bene' besyedabague' yež Israelen'. Perw na' beyož be'

Diosen' legaque' latje güen ni con bososane' bich gosonxene' le'. Lente ben' goso'e xtiže' na' lente b̄oz ca' gosebejyichje' bich gosonxene' le'. Yogo'lolle chonxenle da' bibi zjazaca'. Ba gota' da' zed chele dan' bi chzenagle che Dios, perw cate' bin' chac chele, cana'ch che'nele yosle' le'e. Diosen' ba bi'e latje gwžiayi' Efraínna', perw le'e zoale Judán', la'czla' ba ble'ele dan' goc che Efraínna', bina' šejni'ile cheyała' yezolaole gonxenlene' da' yoble. Na' ca nac bene' Efraín ca', še legaque' yesechebe' ba gosone' da' xinjen' na' še yesyeyonxene' Dios da' yoble, le' yezi'xene' chegaque' na' šjayxi'e legaque' cont yesyežine' Jerusalénna'. Na' lecze le'e zoale Judá nga cheyała' yezolaole yeyonxenle Dios da' yoble, le še bi gonle ca', Diosen' sele' soldadw bene' za'ac yež dan' zjachi' cha'le na' yosožiaye'e nación chelen' na' chi saca'chguale. Perw šeca ne to nono zoa bene' chon da' güen bene' che'nde' neзде' non' nac diža' li na' non' nac diža' güenlaže'. Neche da' qui, Diosen' bi yezi'xene' chele neca yeyaše'de' le'e nacle bene' Judá, san güe'e latje cont bene' zito' yesedillene' le'e na' yesone' gan lo gwdiła' na' yeseche'e le'e šjasoale nación yoble.

Ba goc šnejchoa iz chnabia' Josíasen' cate' Necaoy che nación Egipto len bene' soldadw che' ca' gosodie' gała'ze Judá, le zja'aque' gan' zoa rey che bene' Asiria ca' cont yesaclene' legaque' to lo gwdiłe. Nach Josíasen' bchoje' cont tillene' le'. Necaon' bi chaclaže' tillene' le', perw Josíasen' bene' byen. Na' rey che Egipton' betue' le'. Nach bene' Judán'

bosyo^zoe' xi'in da' Josías ben' gože' Joacaz cont
gwnabi'e gualaz da' x̄e'.

124. Joacaz na' Joacim gosenabi'e lao nación Judá

(2 Reyes 23:31 — 24:7; 2 Crónicas 36:1-8;

Jeremías 22:11-12; 25 — 26; 31; 36)

Cate' beyož gosote' Josías lo gwdi^le, xi'ine'
Joacaz bołane' xlatjen' goque' rey, perw šon bio'ga
gwnabi'e, le Necao ben' chnabia' Egipto bene' byen
gwdixjw nación Judan' mechw da' gwⁿabe'. Na' rey
che Egipton' gwchi'e Joacazen' Egipto na'le na' gualaz
le' bozoe' Joacim bene' biše' Joacaz. Na' ben' be'
xtiža' Diosen' ben' gože' Jeremías gwne' gwbatech
yežin Joacazen' Judán' san gwne' Egipto na' gate', na'
ca' goc.

Rey Joacim bi bzenague' che Diosen', nach con
ca gwzologüe' chnabi'e Jeremíasen' gwne' še bene'
Judá bi chososane' chesone' da' xinjen' Diosen'
gwnežjue' latje to cuen soldadw che nación zito'
yosožiaye'e ciuda Jerusalénna'. Gosenita' bene'
goseziye'e bene' Judá ca' gosene' cheso'e xtiža' Dios,
na' lega^que' txen len zan bene' Judá na' zan b^xoz
che^gaque' gosac^laže' yesote' Jeremías cate' gosende'
can' gože' lega^que'. Nach bał bene' gole blao che
Judá jasyese'ede' laže'ga^que' gose'ene' lecz ca' ba gwde
do to gayoa iz gwzoa to bene' be' xtiža' Diosen', ben'
gože' Miqueas, bena' lecze ca'yaⁿe' gw^dixjue'ede', na'

ne to notno betw le' neche da' gwne' ca'. Na' dan' gose'ene' ca' bososan bene' ca' bi gosote' Jeremías.

Cate' goc šon iz chnabia' Joacim, Jeremíasen' gwzologüe' gože' yogo'lole', gwne':

—Le'e bene' Judá, lao šonechoa iz ba zoa' nga chyixjue'eda' le'e xtiža' Diosen', perw bicze chaclaže'le gwzenaglen. Dios že' še le'e gwsanle bich gonle da' xinjen', le' gone' latje soale yežlio nga dote tiemp gan' bnežjue' da' xozxta'ocho. Perw na' le'e zejzele chonxenle no lgua'a lsaca'. Da'nán' Diosen' güe'e latje Nabucodonosor rey che Caldea yedetillene' le'e na' gone' le'e gan. Na' neche da'na' šjasoale yež zito' gayonši iz. Na' lecze Dios güe'e latje cont gon Nabucodonosor gan nación dan' zjachi' cue'ej cuit nación Judán' na' cate' te da' gayonši iza', Diosen' gone' castigw bene' Caldea ca' na' noch no yesenita' Caldea.

Na' yeto šni'a Jeremíasen' gwne':

—Diosen' že' žin to ža cate' co'o cho'e to da' cob da' gone' gaclene' le'e, perw gaquen nža'le len dan' bene' len da' xozxta'ocho cate' bebeje' legaque' Egipton', le' legaque' bi gosone' can' gosego'o cho'agaque' yesone'. Na' da' cob dan' gon Diosen' len le'e, gone' cont yebele ley chen' lo' lažda'olen' na' gacle nación che' na' lecze yezi'xene' yogo'lol' da' xinj da' ba benle.

To ža gož Jeremíasen' to bene' güezoj bene' gože' Baruc yogo'lol' dan' ba gož Diosen' le' cont bzojen'. Dios goclaže' bene' Judán' yososane' bich yesone' da'

xinjen' cont bi gone' ga yesezaca'zi'e. Perw cate' rey Joacim bende' rsonna' bitw betinjide' che yogo' da' xinj dan' ba bene', san bzeye' yiš dan' ba bzoj Baruc cont blo'e bi chejli'e che xtiža' Jeremiasen'. Nach Diosen' bene' mandadw gože' Jeremiasen' gwzoje' xtižen' da' yoble na' ye'e Joacimen' Diosen' gone' le' castigw bi güe'e latje yosocuaše' cuerp chen' cate' ba gote'.

Cate' Joacim gwzologüe' chnabi'e lao nación Judá gosezologüe' goseyixjue' mechw to to iz lao Necao ben' chnabia' nación Egipto cont bi tillene' legaue'. Na' cont dob mechw dan' chixjuen', Joacimen' bene' byen goseyixjw bene' Judá ca' mechw zcha'o. Nach bžin ža cate' Nabucodonosor rey che Caldea bene' gan lao rey che Egipton' na' benen byen Joacim gwduxjue' len Nabucodonosor na'le dan' cheseyixjue'. Perw ca gwde šon iz gwabague' bich gwduxjue' dan' cheseyixjue' lao Nabucodonosoren'. Nach Diosen' bi'e latje cont soldadw che zan nación gosediłlene' nación Judán'. Gwdechle bžin rey Nabucodonosor gwdiłlene' nación Judá na' gwchi'e to cuen bene' Judá ca' Babilonia na'le, na' lecze beyo'e zan tas na' cop na' ša' che yodao' che Diosen' na' bcue'en liže' da' zoa Babilonian'. Cate' bžin ža got Joacimen', xi'ine' Joaquín bolane' xlatje' goque' rey che Judá.

125. Bene' Caldea ca' gosezene' bene' ca' že' Judá na'
goseche'e legaque' Babilonia

(Daniel 1 — 3)

Ladjo bene' ca' gosezene' Judá, rey
Nabucodonosoren' ben' gwnabia' Caldea, gwleje' zan bi'
güego' bin' gosac bi' yichj yaš cont yososedbe' yela'
sina' che bene' Babilonia na' yesombe' žin da' zaca'
che nación Caldea. Na' tap bi' ca' gwleje' zjalebe'
Daniel, Sadrac, Mesac na' Abed-nego. Na' Diosen'
goclene' legacbe' cont gosejni'ichgüebe'. Na' ľecze be'e
Danielen' grasyw cont gwejni'ibe' bi zejen no yel
bišgal da' gwne bene' o bi da' ble'edagüede'. Na'
Nabucodonosoren' beca'achgüe' chegacbe' dan' gosacbe'
bi' gosejni'i, na' gwyazlaže'che' can' gose'be' ľe' cle ca
dan' gosena yezica'chle bene' bosozejni'ide' ľe' naquen'
cheyaľa' gone'.

Bžin to ža cate' Nabucodonosoren' gwñede' yel
na' gweje' lao to chop bene' sina' ben' bosozejni'i ľe'
na' gože' legaque':

—Le na neda' naquen' gwñeda' yel na' bi zejen.

Na' legaque' gws'i'ene':

—Bi gac ye'to' ľe' bi zejen še bi yo'o neto'
naquen' gwñedo' yela'.

Nach blocchgua Nabucodonosoren', na' bene'
mandaw yesote' yogo'ľoľ bene' sina' ca' že' Babilonia
bene' ca' bosozejni'ide' ľe' naquen' cheyaľa' gone'. Nach
ja'ac soldaw ca' cont yesezene' Danielen' len bene'



Rcy Nabucodonosoren' gwleje' zan bi' Israel zjanac bi'
güego' cont gososedbe' yeļa' sina' çhe bene' Babilonia ca'.

migw che' ca' šone cont yesote' legaue' txen len yezica'chle bene' sina' ca'. Cate' besežine' gan' zoa Danielen', Danielen' gwnabde' legaue' bixchen' ben rey mandadw yesote'ne'. Na' cate' gose'ene' bixchen', nach Danielen' gwyeje' gan' zoa rey, gože'ne':

—Le cuez štit —na' goclaze' rey cueze'.

Nach la' beza'te Danielen' beyej liže' jayeže' bene' migw che' ca' dan' chaca'. Na' yogüe' gosezolagüe' chosolgüiže' Diosen' chesenabde'ne' gaclene' legaue'. Na' Diosen' boži'en gože' Danielen' naquen' gwne reyen' yel na' bi zejen. Nach gwyej Danielen' gan' zoa xan soldadoa' na' gwnelene' le', gože'ne':

—Bi goto' neto' ne yezica'chle bene' sina' ca' chosozejni'ide' reyen'. San šjasano' neda' lao rey da' yoble.

Xan soldadoa' goclaze', na' jasane' le' lao rey. Cate' bžin Danielen' lao Nabucodonosoren' na' gwzolagüe' be'e diža' che yel dan' gwne reyen', gože'ne':

—Ne to nono bene' zoa la' bene' zelagüe nacchgüe' bene' sina' bene' gac ye'e le' bi yelen' gwnedo' na' bi zejen. Perw zoacze toz Dios ben' zaca' gonxen yogo'cho, na' len' chaclaze' nezdo' to da' za' gacle. Da'nan' bene' cont gwnedo' yelen'. Cate' gwnedo' yelen' ble'edo' to da' xen da' naquen lgua'a lsaca' bene'. Yičjenna' naquen de oro, cho'alcho'en na' ne'enna' zjanaquen de plata, le'enna' naquen de ya dan' že' bronze, xyičjenna' naquen conte le ya, na' ni'enna' laten' nac de gona' na' yelaten' nac conte le

ya. Ca beyož ble'edo' da' nga, nach ble'edo' bchoj to
yej xen le'e ya'a jasoan ni'a dan' nac ca bene', bzoj
btinten doxenen. Ca beyoža', bso be' len. Nach yejen'
beyaquen to ya'a xen gole.

Can' gwnedo' yela', na' qui zejen: Rey
Nabucodonor, le' naco' yichjen de oron', le napo'
yela' chnabia' xen. Na' cate' ba gwde to tiemp, nach
to bene' zito' gwlane' xlatjo' na' bene' naci3n che'
yedesenabi'e, perw yela' chnabia' chegaque' bitw
yezinlažen ca yela' chnabia' xen chio'. Can' zejen gan'
nac de plata. Na' tech soacze yeto naci3n bene'
yedesenabi'e šlož, na' gan' nac de ya dan' nzi' bronce
zejen naci3nna'. Yeyoža' soa yeto naci3n da' gwdape
yedesenabi'e, na' gan' nac conte le ya zejen naci3nna'.
Na' ni'e dan' nac laten' conte le ya na' yelaten' gona'
zejen naci3nna' chojen chople na' to cuenen gac da'
zaca'ch na' yeton bibi zaca'tec. Na' cate' ba gosac da'
ca', Diosa' gwzoe' yeto naci3n da' gwbat cuiayin'.

Can' nac dan' gož Danielen' Rey Nabucodono-
soren'.

Bebehgüe rey Nabucodonosoren' dan' bzejni'i
Danielen' le' che yelen' dan' gwne'de' na' bich betue'
bene' sina' ca'. Nach bzoe' Danielen' goque' bene'
gwnabia' blao che Babilonia.

Na' ca gwde to tiemp, Nabucodonosoren' bene' to
lgua'a lsaca' da' xen gole de oro da' naquen ca nac
bene', na' bene' mandadw len yogo' ben' že' Babilonia
yosozoa xibe' yesonxenen' cate' yesele'eden'. Na' še to
bene' bi gone' can' gwne'na' na' yesegüe'ene' to lo'



Nabucodonosoren' bene' to l^gua'a l^saca' da' xen gole na'
bene' mandaw yogo' be^ñe' yesezoa xibe' yesonxenen'.

horn da' chaja'ninen cont šeye'. Na' ca nac Sadrac,
Mesac na' Abed-nego, legaue' zjanite' lo ciudan' cate'
ben reyen' mandaw yesonxene' lgua'a lsaca' de oro
dan' benen', perw legaue' bi bosozoa xibe' laoguenna',
le bi gosaclaže' yesonxene' da' bi nac dogualje Dios.
Nach Nabucodonosoren' bi'e legaue' yeto latje cont
yesonxene' lgua'a lsaca' dan' benen', perw šlasze bi
bosozoače xibgaue' yesonxenen'. Na' gosi'e reya':

—Nezeto' zoacze Dios ben' chonxento' na' guac
yosle' neto' cont bibi gac čheto' še co'o neto' lo' horn
dan' chaja'ninen. Perw la'czla' bi yosle'nto', neto' bi
gonxento' dan' nac ca'.

Cate' bene Nabucodonosoren' dan' gose'ene',
goclocchgüe'. Nach bene' mandaw len bene' güen žin
che' ca' yosoladao'che' hornen' na' yosocheje' yon bene'
Israel ca' za'ac Judá na' yesegüe'ene' lo' horna'.
Gosatte bene' ca' gosegüe'e legaue' lo' horna' tantw
ba nładao'chguan. Goc šlož že' bene' ca' lo' hornen'
cate' ble'e Nabucodonosoren' zjaze tap bene' lo' yin',
na' bene' gwdaopen' naque' ca' nac Dios. Nach gwbigue'
cho'a horna' na' bosye'e gože' legaue' yesyechoje'.

La' besyechojte yon bene' ca', ne late'ze ca
goseye' neca chesele'e ze žen. Na' dan' goc ca',
Nabucodonosoren' bzoje' to ley da' žan note'tez bene'
bi da' mal da' nie' che Dios ben' chonxen Sadrac,
Mesac na' Abed-nego, cheyala' sie' to castigw.

126. Ben' le Joaquín gwnabi'e Judá

(2 Reyes 24:8-17; 2 Crónicas 36:9-10;

Jeremías 22:24-30; 29:1-14)

Cate' Joaquín ben' goc xi'in Joacim gwnabi'e nación dan' nzi' Judá, šon bio'ga gwnabi'e. Lagüe dan' bi bzenague' can' bžia bia' Diosen' gosone', Diosen' gwsele' ben' gose'e Jeremías ježe'ne' bene' zito' ca' yeseče'ene' lažgaque' gan' gate'. Nach Diosen' bnežjue' latje jatillen rey Nabucodonosoren' rey Joaquínna', na' soldadw che' ca' gosezechje' ciuda Jerusalén. Cate' gocbe'e rey Joaquínna' bi soede' tillene' rey Nabucodonosoren', na' ben cuine' lo ne'e, nach rey Nabucodonosoren' gwche'ene' Babilonia dan' nach ciuda blao ga mbane Caldea. Lecze gwche'e bene' blao ca' gosac bene' ljež Joaquínna' na' len ben' gosac gosone' no xšinlaze' da' bosochine', na' len soldadw ca' goseže'e nación Judá. Yešinga bene' zjanacchgua bene' yaše' bcua'ane' Judán'. Na' bzoe' to bene' xa Joaquín ben' gože' Sedequías gwnabi'e gualaz le'.

Nach Jeremíasen' gwsele' to cart lao bene' Judá ca' gwche' Nabucodonosoren' Babilonia, bzende' legaue' can' gwna Diosen' cheyała' yesone'. Gože'ne' cheyała' yeson ližgaue' na'ze, na' yesaze', na' yosošagne'e, le yesyega'ane' Babilonian' gayonši iz, tenach Diosen' gwnežjue' latje yesyežine' Judán' da' yoble.

127. Ben' gože' Ezequiel gwđixjue'ede' xtiža' Diosen'
len bene' Judá ben' zjanita' Babilonia

(Ezequiel 1 — 24)

Ladjo bene' Judá ca' gwčhe' rey Nabucodonosoren' Babilonia txen len rey Joaquín gwzoo to bene' gože' Ezequiel ben' gwlej Diosen' cont be'e xtižen'. Na' cate' ba zjanite' Babilonian', Ezequielen' ble'edagüe'de' yela' zaca' juisyw čhe Diosen' na' Diosen' gože'ne' cheyała' šjatixjue'ede' xtižen' len bene' Judá ca'. Quinga gož Diosen' le':

—Chseja' le' šjatixjue'edo' xtižan' len bene' Judá ca'. Perw nezda' bi yosozenague' čhio', le zjanacchgüe' bene' güedenag. Decze de chonen byen šjatixjue'edo' šježo'ne' seja' yela' zi' čhegaque' na' yesale'chgüede' neče da' xinj dan' ba gosonen'. Yesale'de' čhe xtoła'gaque', perw še bi šjatixjue'edo'ne' can' yesac čhegaquen' neče da' mal dan' chesonen', lecze naquen xbago'. Na' še šjatixjue'edo'ne' nac gac čhegaque', dan' yesalede' naquen xbagá' legacze'. Na' ca nac bene' ca' cheson da' güen, še bi šjatixjue'edo'ne' nac yesac čhe bene' cheson da' malen' na' še yesezomagüe' yesone' da' malen', dan' yesale'de' naquen xbago' da' bi gwđixjue'edo' legaque' xtižan', na' lencze xbagá'gaque' dan' bi chosozenague' čhia'. Perw na' še čhixjue'edo'ne' ye'gaco'ne' yesale'de' še yesone' da' mal, šeca gosozenague' čhio' na' bi yesone' da' mal neca yesale'de' neče xtoła'gaque'. Na' neda' yebeda' can' chono'.

Nach Diosen' bzejni'ide' Ezequielen' can' goclaže' ye'e bene' Judá ca', na' Ezequielen' gwduxjue'ede' legaque' xtižen', gwne':

—Diosen' güe'e latje bene' Caldea ca' yosožiaye'e ciuda Jerusalénna' cate' šja'aque' šjasene' gwdiļe, na' güe'e latje yesote' bene' zan bene' gualaž chele bene' že' na'. Baļe' yesate' gwbin, baļe' yesate' len yižgüe' na' yebaļe' yesasļase' yezan nación yoble. Yesac chegaque' ca' da' bi bosozenague' che Diosen'. Le da' malchgua ba gosone' gosonxene' lġua'a lřaca', lente lo' yodao' gan' cheyaļa' yesonxene' toz Dios ba gosonxene' da' ca'. Da'nan' Diosen' güe'e latje bene' Caldea ca' šjasexi'e yezica'chle bene' Judán' ne' zjanga'an Judá, yesече'ene' Babilonia nga. Na' lecze šjasexi'e Sedequías ben' bzoa Nabucodonosoren' cont chnabi'e bene' ca' ne' zjanga'an Judá. Gaclaže' Sedequíasen' gwxonje' perw bi gac. Na' la'czļa' žine' Babilonian', bi le'ede' ciudan'. Yeto chopga bene' Judá yesyega'an cont yosošalje' che dan' yesele'ede' gaca', na' legaque' yesacbe'ede' toz Jehová nan' nac dogualje Dios ben' cheyaļa' yesonxen benachen'.

Diosen' lecze gože' Ezequielen':

—Gož bene' gualaž chio' ca' diža' quinga da' žia' legaque': "Neda' Dios gwleja' yogo' le'e bene' Israel cont nacle nación chia'. Da'nan' zaca'lebda' ca to bene' byo ba bželde' no'olen' si'e gac xo'ole', na' le'e zaca'leble ca no'olen' si'en'. Perw no'olen' zoa ga'alyide' na' nac cuerp chen' leca bzigüe'. Na' cate' bžele bene' byon' no'olen' nac ca' nach beyaše'de'ne'

na' bnežjue'ne' lache' xdan da' gocue' na' gwxi'ene' goque' xo'ole'. Perw beyoža' no'olen' goque' ya'laže' na' bich godde' bene' čhen', san gwzologüe' chchoje' chjatiljue' bene' byo yoble talene' con can' chesoncze no'ole zlen'. Can' zaca'leble da' ba cha'laže'le chaquele bich chyažjele neda' na' gualaz da' gonxenle neda' ba beyiljwle lgu'a lšaca' chonxenle. Da'nan' gona' cont saca'zi'le.

`Neda' Dios chaclaža' nezele šinze bene' ba goson da' xinj yesale'de' neče dan' gosonen'. Bitw nacho gona' cont yesale'de' neče da' xinj da' goson no xaxna'gaque' o no xi'ingaque', san yesalede' neče xtoła'gaque' na'zen'. Na' še to bene' zoe' chone' da' xinj perw gwsane' bich gone' ca', na' solagüe' gone' da' güen, neda' yezi'xena' che da' xinj dan' ba bene'. Chazlaže'cha' še to bene' mal yeyaque' bene' güen clel ca' gona' cont saca'zi'e. Perw še to bene' chon da' güen gwsane' bich gone' da' güenna' na' solagüe' gone' da' xinjen', na' gona' ga saca'zi'e na' bi šjayza'laža' da' güen dan' ba bene'.

`Gwzolaon cate' bebejtia' xozxta'ole ca' Egipton' bla'ten ca' ža na'aža, le'e nacle bene' Israel bi chzenagle čhia'. Le'e nacle chopte nación Judá na' Efraín, dan' ba gwlejyichjele neda' na' chonxenle lgu'a lšaca', zaca'leble ca' bene' ca' chop bile' zjanac no'ol zle'. Zaca'leble ca' no'ole ben' ba bošešagna'lene' to bene' byo perw la' zja'actie' len bene' byo yoble cont yesata'lene' legaque'. Zgua'tec bene' ca' gosenita' gan' nzi' Efraín gosebejyichje' neda'. Da'nan' bi'a latje gosediilen bene' Asiria ca' legaque' na' bosožiaye'e

Efraínna'. Nach le'e gwzoale gan' nzi' Judá ble'ele can' goc che bene' lježlen' gwže'e Efraín, perw ne ca'cze ca bzenagle, san lencze le'e benle güedenag len neda'. Da'nan' gua' latje yosožiayi' bene' Caldea ca' nación chele.

Beyož gož Ezequielen' bene' ca' yogo' da' ca' dan' gwna Diosen', nach bzožen' gože' legaque':

—Categaze rey Nabucodonosoren' šjayxi'e yeto cuen bene' ca' ne' že' Judán' cont gwlo'elaon nac diža' li da' quinga ba gwnia' le'e.

Esta ilustración
no está
disponible.

